

李恕谷先生年譜

李恕谷先生年譜卷四

清苑馮辰纂

武進惲鶴生校

孫鎔重修

乙酉年四十七歲

儀功如常智仁聖義忠和時時自考有一得否孝友睦姻任卹
隨遇勉行主敬而用以寬和禮樂射御書數有力卽習之
聖道接引來學二月郾城役來請先生南行偕三弟培往

語三弟以身隨時而動心無時不靜思幼者以動爲樂老者
以靜爲安靜坐者衰世之學也祥符教諭齊榆韓石以大學
辨業爲是來拜問學十六日至郾署爲署事變思不能待
小人吾之過也又思神農偕人何賡之休宜去辭行主人苦

留 選訂習齋記餘 陳留令許不棄來拜邀過其治 過西

平與趙澄溪論政 思敬和謙大 益修鳩工刊習齋存性存

治存人三編 益修餽金製夏衣辭之 鄆陵魏膚功來拜問

學答之贈以贖 抱疾 語三弟曰德之主在仁而用在智無

智則德俱無用矣故論語終以三知中庸四德首以聰明睿知

孟子贊孔子大成獨推其智也 教諭暢泰徵聞先生將行請

筵問學 四月二十一日力辭行益修餽贖命役騎送歸 過

羅寨拜魏膚功 過陳留與許公論政其邑孝廉馬懋德來拜

論學王次峯弟子也 過祥符東柳林王秉公來拜問學 一

路疾不食行自如 抵里知從兄輩生以前月卒哭之慟 倘

來役令回疾漸愈 先生以家口衆思儀禮同居異宮令人得

展其私親也其義甚是後儒不明此義詭稱數世不分至于宗

族數百口同食夫同食而使各有私財則與析箸無異矣若使無私財而財司于家主一人則惟家主得孝其親慈其幼耳家之老少若干或衣或食或疾疴藥餌必不能盡白家主家主卽公且明必不能盡遂其私以致于不得孝親親不得慈子兄弟夫婦不能問恤怨歎疾咨非細故也況庸情人衆推諉必不勤黷爲公物必不儉甚至據公爲私則壞品敗爭張公藝書忍字百餘其家之蓄戾洵叛可想矣是尙謂之美乎古有南宮氏北宮氏謂士大夫同居異宮者也若天子諸侯子壯出分實爲定禮矣鵠按內則命士以上父子異宮百姓一家過八口則別授井田是貴賤皆分也 辰館菴高先生遙贈訟過則例辰遂上書同學 辰齋宿來拜問學先生教以約心力行學經濟命立日記 修習齋年譜 七月思先人泣下語諸弟曰父子兄弟

同居異宮古禮也今人口衆多養餽教失立見可虞今使汝等
分居各自力業以習勤儉燕客禮儀餽遺祭享皆我應各善爲
之 辰立日記來質學先生評之甚喜出日譜令辰評又以辰
進規學習齋力行古道更喜曰從今相我吾道庶不仆矣 思
吾自二十二歲志聖學躬行學經濟二十七歲後出館四方
漸通世事四十知操存心性立定擔荷聖道廣結名流學乃博
今得樞天或天不墜此道乎成之予之責也辰按先生期辰至
遠大奈辰遲鈍于經濟甚遲恐未能副也然不敢不勉以求得
先生之一體亦可耳 八月齋戒如楊村致顏先生公祭後非
出遊二八月爲常 思人不附非耦則刻 思莊敬竦起又思
人偏則愚故大學戒有所 習恭 思天人相與之際甚矣人
而自喪是喪天也敢不畏乎 行中規矩 辰質學先生曰先

人言心如刺繡顏先生言心時時起漚子力學行心常在道矣
自此涵而勿強養而勿息時以天理澆灌乃心人欲自息忘之
天理日新世故人情日析則學可進德可成勉之 率辰習士
相見禮 辰問謙敬和事親長之容乎先生方食不語既而曰
非也洞洞屬屬如執玉奉盈婉容愉色事親之容也垂佩而立
類躬而坐窮窮恂恂黜賢去智事長之容也若夫既敬且和抑
然以謙此待朋友同等之容也 九月告先祠命諸弟析箸朔
望拜獻家祠侍母同諸弟子侄餞後爲常 家務蠅集心不雜
曰家無實不祥不祥之實聽婦言者當之 思履危途而視
若坦愚也志不強弱也皆過也 擬事母下氣怡聲失則書
思人急迫我寬裕人銖兩我通覆乃可言學 思晝有得夜有
思近頗不愧而入廁搔癢不忘敬未若戊寅年也愧之 辰問

七出而值三不去何以待之日待之各不同有仍待以夫婦禮者有夫婦禮絕直養之終身者 十月先生以辰比過法佳因自勘促暴躁急瑣碎人自恕入內不莊立跛坐倚八過朔望比之 率弟益溪閭季伯及辰習祭禮三度 纂祭禮一家祠二所祭三主室室四神主位次五家祠公祠並立六祧主不祧主七祔八生母祔祠九主祭十公祠以族長而襄以賢以貴以富十一時祭十二薦十三齋戒十四薦儀十五灌酒焚蕭脂十六楮幣十七歌樂十八朔望謁薦十九薦新二十節令二十一出入告二十二居喪不廢宗廟祭二十三程伊川冬至立春季秋三祭之說二十四文公家禮忌祭之說二十五五祀二十六先聖先師二十七社二十八司命 劉心鏡劉發璋從遊館于王家營率習仁讀小學 每卧服膺小心翼翼昭事上帝 思

好與人深言者無經濟 思人不爲聖賢長苟且苟言苟行苟
安一時苟焉自待皆是也 思念茲在茲有念之存養也釋茲
在茲無念之存養也名言茲在茲言之存養也允出茲在茲行
之存養也所謂心在也作詩曰安得兢兢不日加臨深履薄更
無涯無端嗜慾離弦弩自具中和上岸車日三復之 語三弟
曰有事可以驗學乃反忘學恥也 思遺心喪樂將忘矣禮曰
大功誦乃將誓歌低聲誦之 卧容肅 思身爲天下萬世之
身者不以目前得失動其心 聞母病目旋視心如割延醫
或問佛道及文昌曰佛之邪言惟有心經他經率劉勰偽作老
子言亦偏而非今道教也修煉始魏伯陽符籙始張道陵出家
滅倫則染佛教也文昌乃司命七祀之一附以梓潼帝君者道
家之妄也 辰問克伐怨欲不行及仁之辨先生曰不行障決

也終日乾乾盡力學行也夕惕若夜省察操存也可無決矣偶
疾而決長河一瀉決反安流此求仁之道也 教辰以精神包
羅閭座及言語威儀之道 辰朔望遙拜先生先生問之遙答
揖 副室呂氏久病教以養心和平修德盡道 思怨天尤人
必不下學下學必不怨天尤人 先生懇聘貴顯山珍海錯日
羅列泊如也歸食糠粃卽甘之 十二月旋自館思境寒心和
事迫心裕 溫益修印所刊三存編至喜之

丙戌年四十八歲

訂一歲常儀功日興揖母省安揖先聖家人門人揖者答之朔
望率諸弟拜家祠五祠各四拜母四諸弟子侄拜答揖妻拜連
叩四答再側拜答揖馮樞天每日遙揖于朔望遙拜于辭不獲
遙答揖三弟遙拜答揖元旦元宵清明七月十五十月一日五

祀家祠俱薦臘月二十四日祀龍戒二日不飲酒不茹葷不弔
喪不入內不與穢惡不問疾齊一日沐浴思神又有日齊時齊
刻齊謂偶有所交神則尅期齊心也過神祠式或下過祖墓下
親友墓賢者墓或式或下入里門下出乃乘日譜記言行每時
下一圈心在則白失言則黑圈左失行則黑圈右躁暴則黑圈
上愁動則黑圈下心放則純黑晝有爲夜有思瞬有存息有養
學究禮樂兵農射御書數隨時書事親以順待諸弟以和屋漏
內室必莊小心翼翼昭事上帝時服膺之守先待後明道行道
之志勿一日怠 正月劉明若餽公車賦受其半 餽張函白
養老儀 如都楊公度齋 哭劉綽然綽然諱有餘京師人習
天文歷算好交天下賢豪四方觀光有名者必屑傳延致無斧
資者助之人不知其貧士也遨遊士大夫間羽衣芒屨飄然如

仙六十九歲卒 哭郭子堅爲立傳曰郭令子堅諱金湯京師人也其弟子固識子子稱人子堅亦篤信焉子與二人少長各一歲參列若舅弟然子堅性質直不侵爲然諾好潔勤細務井井出知桐鄉縣事延予至愛禮之甚厚已歸又延至憂予將四十妻無子重聘爲子置副構留春樓以居子子生子彌月奏樂設筵乃載旋里莅官明于獄決抑豪強擊猾吏嘗與予並轡聯輿出勸農桑赴薦紳席不以官自異也子遊西湖訪師友遣役齋資斧恣所之有過問學者飭厨傳恐後丁祖母艱年四十八遂卒嗟乎洞烈生平情義之交未有如之者也其內子四川巡撫子養志女敦潔嫻雅歲時以丘嫂禮相見拜讓中節凝如也與子堅相敬如賓御下無妬子初往桐比返僅六閱月子堅爲我製單複絮簪以爲衾服倒頓柏腹之屬其六十餘嬰皆子夫

人手自縫紵及子有副子堅戒聞曰李先生所用布帛果養鍼
縷米鹽諸物有呼卽應勿關我當未往桐時子固軫念予後先
爲我家中置一副子嘗語諸子曰而世世勿忘郭氏二公也
思子生平大短曰傲見時人非則傲生不知時愈下人愈非天
之禍益迫矣尙敢傲乎不智哉不仁哉吟曰人淡我亦淡人驕
我亦驕庸庸適相學而以語英豪 問西洋三角算法于吳子
淳子淳曰卽勾股也而勾股不如三角之密蓋勾股之三角二
曰銳角而勾股之間曰直角直角藏方一定之數故鉤三股四
絃必五三角之三角二曰銳角而二銳角之間曰鈍角無定之
數故鉤股弦不必三四五以三四五不能盡御三角之變也
王崑繩至自廣東相見學進氣壯衛道甚力喜之崑繩述魏叔
子云考古以証今閱事以察理求友以自大其身造士以使身

之不死 李生敏志來拜論學高陽相公孫也 吳次張問律
呂作律呂問示之 王太倉謂先生曰方今翰苑乏人僕開列
主問若進必中君以資館選先生力辭之 同崑繩訪方靈臯
及戴名世 晤毛姬漢得毛先生手書曰南北睽隔艱于相通
每有記憶及思量告語者輒掩卷太息而已足下于禮樂大事
皆洞徹源委發漢唐以後未發之秘實先聖先王所繫賴一大
人不揣一日之長實所愧心聖道聖學全在大學誠意中庸誠
身論語一貫忠恕孟子反身強恕盡之斷勿爲宋儒主靜等說
所搖惑則直接孔孟矣祇聖賢重事功兼重仕進論語節節可
驗則八股雖陋然借此可以出身行道努力科場非分外事也
勉之勉之先生復書曰拜讀先生來教八十四歲猶然蠅頭細
帖核博精明與十年前一范知長爲斯道津梁也許堪以禮樂

洞徹原委不敢當至勉以誠意強恕勿爲主靜等說所搖敢不佩服恭學樂書已成六卷學禮則郊社禘祫宗廟田賦士相見冠昏喪祭各有論著十五本之傳習主靜等說不敢習誤已有剖諍具大學辨業聖經學規纂內今呈教公卿自果亭匪菴外徐大司農極可與言一見論學卽契合語友人溫益修曰李某有體有用正學也李安溪曾以瑤知律呂達 當宁欲羅致門下而瑤拙愚竄伏未之敢見也海內惟王崑繩一人初爲文人爲豪士晚以瑤言爲聖賢學省躬改過共肩大道同里新得一人曰馮辰篤行不惑魏叔子曰求友以自大其身造士以使吾身之不死不知何以無愧此言也 黃崑圃葬父往會之途語方靈羣曰君疑格物非周禮之三物乎三物之六德卽仁義禮知也六行卽子臣弟友也六藝卽禮樂兵農也請問大學之物

尙有出此三物外者乎吾人格物尙有當在此三物外者乎卽
雜以後世文章講論亦祇發明此三者耳格物非三物而何吾
儒明德親民之學乃尊于農工商而爲士之職也試觀宋儒用
佛門惺惺法閉目靜坐玩弄太極探獵性天內地不雜于二氏
乎終日章句吾伊經濟安在試思伊尹割正有夏周公制禮作
樂東征是皇孔子擊萊墮費以期月三年自任宋儒學教有是
乎不過明理尋樂共爲獎借耳孔孟之傳如此而已乎盡全體
大用之道乎士之職乎靈臯曰是因問治河水利弭盜先生畧
言之 旋里二月二十三日申時抵家呂副室辰時已卒入門
先拜母候安乃之其尸旁哭之考儀禮庶子不爲父後者父在
厭于君其母卒則爲權服喪服記所謂公子爲其母練冠麻麻
衣緦緣旣葬除之是也

齊王子正同此故其傳爲請加數月

父沒則大功大功章

所謂君之庶昆弟爲母是也爲父後者父在則總總麻章所謂
庶子爲父後者爲其母是也父沒則三年齊衰三年章所謂父
卒則爲母是也母兼嫡母生母言故下文曰慈母如母正指生
母也若以爲如嫡母則慈母有側生子而死而父命別側慈之
者也其恩雖深不可以圖生我者之恩矣乃爲服三年一如嫡
母而生母之服反沒其文有是理與若曰厭于嫡而降除則慈
母亦側獨不降除何歟是爲母內卽具生母昭然也若大夫側
子則父在爲其母大功父沒三年士側子則父在爲其母期父
沒三年明安國註春秋曰祖庶子爲君爲其母無服沒無考而謬造禮如此及明太祖定禮子爲
父母庶子爲其母皆斬衰三年今制因之又考喪服小記妾附
于妾祖姑又考喪服曰貴妾總喪小記曰士妾有子而爲之總
先生乃定服總命二子成三年服葬于祖兆祔于家祠如禮

劉心鏡復請館于王家營劉心衡李書思劉心蕙劉珙從學

作副室王氏行狀畧曰王氏名鳳姑杭州錢塘人曰呂者其父

出養于呂也郭子堅爲予聘之年十六歸我副室子堅字之曰

素娟寓桐鄉署西樓上素娟日讀女要習書刺箴絜樓東退思

軒時時張燕褰弄未嘗啟牕一覲不花飾嘗不傳粉蟬鬢雲

堆微髮懶粧燕尾垂髻而已香囊不掛衣摘蘭茉莉梔子亦從

不插髮或時置帷而已夜卧必衷袒服曉瓏璫卽起當戊寅歲

予方著大學辨業學樂考禮內存心外省容事勉力憤然功頗

密教之見予必起命乃坐朔望隨予行禮以敬相成抵冬生長

子習仁次歲旋里初居桐廬爐類桂花露曳紵被錦厨必設珍

果資陳儲而素娟三餐外不雜食予亦比日衣食僉賢主人供

却然糟糠汲輓乃吾家物邪也至是盡斥錦繡大布椎結硬

米研麵浙米炊與介婦分班操作力脆不辭入室復學紡績未
聞一歎憶暇豫也初歸舟載稻米十石子堅曰下客不能北食
走餽此食之及至家素娟曰郎何得別食同衆飽景林連糠粳
語我曰不解何味子曰服自解數日後遂安之若忘不復言
輟糲稻盡入公用糴易錢無一粒私煮食者已而從予館肅寧
仍以班旋里司爨生次子習中以月間滯血兼從前勞動成疾
荏苒二三載以卒傷哉子元配王氏甚順素娟甚貞而皆不永
年子無德以居之也素娟卒年二十四題其主曰貞懿呂氏
命侄寅虎曰習習子隆官曰習仁侄易貴曰習聖立志曰習義
子存官曰習中

以始繼論
忠故名以中

欲以三物教之也使習智習仁習

小學事

四月張聲采舒自長安來訪論律呂先生以方營葬

事不能議樂但樂學海內乏人今三千里來一共學者不盡其

長後會安知因聽其歌彈盡其說而不辨 葬王副室 五月

入京以閭公度分房被譴視之都憲吳公匪菴請假歸送之匪

菴餽葛綱爲別受之收大學辨業學規纂板旋過涿板寄陳極

如齋以王副室三月卒哭行耐祭禮總服闋 習樂 以四

事自課事親愛敬御家莊儉敬屋漏謹細微 語辰曰宋人以

卽物窮理解格物固不切然亦未嘗卽物窮理也吾黨今日乃

卽物用力耳卽如一事來前必聖賢之心庸人之情豪雄之畧

宵小之說一一照徹始有措置宋人所言講書而已其實書理

卽世事世事既不透徹書理亦必多蒙混 六月肩輿迎太夫

人于三弟館侍養 思身之不莊卽學之不振也愧甚 爲太

夫人捶背揮扇侍食後爲常 教心衡騎射馳馬示之 思身

漸衰疲而德不立是吾憂也 定行前視五步不得流及左右

元則記過 思有母可事有子可成天之惠也宜無負天 七
月十五薦家祠訖尚未明乃假寐 李質君巡撫福建書來候
有餽儀受之 穫稷倍者與之一人屢借不償應之緩恩衆
與何獨拒卽與之 王崑繩來哭習齋先生質所擬建官立學
諸法 註易繫詞辨周子太極圖之誣辨陳搏河圖洛書之妄
辨本義統法之非古辨先後天圖之爲異端辨卦氣圖之非辨
易卦配以五行之非 入京收存學編時江南謝野逸金陵張
天球曉夫來拜語以安黃守志 回里知縣張鄭若洲張曜抑
來拜問學 次女歸鄭村劉氏 思人之自其才智者多自暴
自稱長厚者多自棄可歎也

亥年四十九歲

儀功如常去瑣碎戒暴怒勿言人是非待人以和日必習恭一

次 思吾心不精而粗不一而雜年已將衰而德不立愧哉

評辰日記語以老親在堂治生卽學 同彭生現如棗強問學

問地利答之抵棗強鄭宅若洲並其兄兒百良仲長民及張瞻

抑皆出問學先生爲言今古學術之分皆稱是勉鄭張二子以

立志學道勿與草木同朽 三弟培之館教以勿玷先人勿辱

顏先生不覺泣下 李止庵請先生館于新橋李元英等從學

王崑繩偕楊勤慎修來拜問學崑繩出所著平書分民分土

建官取士制田武備理財刑罰准黃禮樂辨宋明之失以復三

代倩先生訂慎修延先生如保定廡先生規慎修以修辦縲事

慎修復具輿馬送先生及崑繩入楊村致顏先生二月公祭告

以平書並告心喪也闕思如一日同人畢集崑繩言平書大意

曰洗滌之乾乾淨淨鋪排之蕩蕩平平安置之安妥當當養活

之歡歡喜喜陶淑之肅肅雍雍崑繩戲謔近放先生規之崑繩
曰吾意以近人也且夙學爲豪傑不能爲道學承教知過矣先
生不言夜半同卧促其床曰君曰謂予盡言而君受言不知予
之言未嘗盡而君亦未嘗受也君謂戲謔所以親人誤也戲謔
過則爲凌玩暴虐人且怨怒而曰親之乎謂爲豪傑不爲道學
又誤也智深勇沉豪傑也使酒難近豈豪傑乎君昨謂我二人
相依爲命若不盡言是我棄命之半也況今海內無人君可偏
任乎崑繩悅服以目疾禁看書定日轉睛七百挽弓數十

自勘心正靜爲諸生言取士之法莫善于周之鄉舉里選莫
不善明之八比清明祭令習仁請其妣主耐食王孺人側祭
畢還殯宮棗強車來迎往爲若洲言主靜之非觀其昆弟習
射三月將母携二子及習智侄如新橋館註易說卦序卦

雜卦 聞李質君卒傷之質君長山人諱斯義清謹以戊辰進士仕至大理寺卿巡撫福建 辰具門生刺請正師弟禮先生受之 辰問不藏怒宿怨非無怨怒不藏宿耳曰然遭家庭之變而尋怨怒者庸人也不藏怒宿怨者聖賢也並無怨怒者恕也異端也 自勘嗜欲淡加也然道心時有不竦立者勉之不然末路祇成庸人矣 二弟五弟來視飲之酒散甚快及行先生送之村外佇望泣下歸語家人曰世有聽婦言而輕兄弟者天地不容之人也 平董姓事門人謂人有言先生曰但視事之可爲否耳勞怨勿恤也 念四十年行道之懷忽爲明道可歎也 聞河決田泮心夷然思吾之命于天也薄宜貧困而學力亦宜貧困以質本庸下豫順則學力緩貧困則學力奮也 某子病將以巫爲義母問先生曰問之先孝慈曰認父母是使

子二本也 止庵被訟先生爲之謀曰曾子之去武城也曰無
寓室毀木以爲反計是明知武城能禦寇也今學亡道岐士不
如周之有用若先生見弟子之播越曰吾父兄可漠然也無此
道矣但不以身殉之耳 思時習章記者置之論語首是爲孔
子寫照也說學不厭也樂教不倦也不愠不怨天不尤人下學
上達知我其天也 夜卧持敬 鄭若洲邀先生如京刊習齋
年譜 聞張采舒卒悼之采舒名翬湖州人以友人有難匿之
被罪流長安囊爽尙義聞天下 王元亮來晤論學以躬行爲
主閱易經傳註乾坤交索圖稱是 王元衡符躬來拜觀易註
稱快

皇子三王謀延先生使陳惺齋問先生行踪于太倉王公先生謂王
公曰草野非王前器也善爲我辭之 若洲有感于佛氏心性

之意先生舉吾儒心性之功以告之 晤張景蔚少文 若洲
言安溪相公見先生易註半許否其門下士忌之先生悚然念
守顏先生之道宰相招以宋儒而不變且其徒有舍之而來從
者幾以賤抗貴矣能無懼乎 回過保定訪金廷襄應枚應枚
固留一日遍招郡中之聞先生者論學 定興劉旃甫問學重
躬行先生是之 彭亨立爲先生如河南取三存編板 先生
與辰言正學難合辰曰宜發晦先生曰然否隱見各一則易隱
見並行故難如守習齋之道而專發晦蘊蔽漸滅矣何以明行
此道于天下萬世乎故不得不通聲氣廣交游也有從者此道
傳有排者此道亦傳此顏先生意也 思北人多忮忮强象也
然散而不一其勢常弱南人善求求弱象也然集而爲黨其勢
常强 劉發璋李果入泮因言發璋父子兄弟夫婦朋友四倫

俱有過人者 爲習巾定婚于齊燧侯七女 一日以事追忘
出告禮中夜覺惶愧不能成寐夙興拜母謝罪 自勘自歎
而不覺者其怨尤之未泯乎可恥也 思家務上事下畜益繁
學問此思彼辨益多交游應酬益廣天下萬世之慮益奢一日
忙如撲火視習齋當日所處又不同務身忙而心閒操存益密
乃爲晚年進境若身心俱忙學力衰矣宜日省 江南毛惕用
九有與黃宗夏書寄至以習齋學爲是 辭新橋館虞朋泣下
謀出亡惻然復許之 每夜澄心 王崑繩來先生規以養心
謹微倡明正道斥去虛文崑繩規先生虛受納言

戊子年五十歲

儀功如常增言有教行有法教子以嚴 如楊村餽習齋李夫
人養儀 獎五弟壻以和平 王崑繩至規先生神散而不收

氣抑而不揚先生悚然懼冗累爲害 如新橋館 思今晉人
曰不長進然吾見長進者鮮矣千古長進者惟孔子其次顏子
觀吾十有五語之而不惰二章可見因勘已四十始立繼往開
來之志今五十矣頗似不惑又勘已致知之功進而力行之功
未進可愧也宜痛自奮勉 習挽弓勢覺骨節痛歎學力衰定
日日習之 如府會崑繩言讀先生易註曠若發蒙快絕千古
但爻變互卦大體伏體半體倒體穿鑿宜更先生微辨之不盡
其言曰世以道學爲根柢以奇門六壬爲智畧以燒煉爲財用
無怪聖道之不興也願吾友務體用之正相泣拜別 聞習齋
孫重光函信悼之因思天生人有禪生有特生禪生常也特生
異也如習齋之生上不關父母下不關子孫乃天特生以明周
孔之道者禪生之常烏足以論之哉 以崑繩學易不可不盡

言乃與以書畧謂繫辭傳曰爻者言乎變道有變動故曰爻故
爻不用七八用九六以云變也左傳乾之姤師之臨等辭皆非
卜筮而卽以變訓爻可據也至于伏體卽對易倒體卽反易文
王序卦于屯蒙五十六卦用反易于乾坤頤大過坎離中孚小
過用對易孔子作序卦雜卦傳以釋之聖言何可誣也 贈宋
佑咸齊燧侯女要倩教女也 鄭見百以車來迎携習仁往途
中遇事卽教之 若洲問輪迴先生曰物物雕琢神鬼紛然且
人與物相輪迴皆妄言也況如彼輪迴之說父子夫婦多尋營
報怨之人何情何恩大亂人倫之道也 思古人祭禮大節有
五晨裸一薦腥一薦熟一饋食一加邊豆醕一今苟簡矣 辨
孟子公侯百里伯七十里子男五十里與周禮公五百里侯四
百里伯三百里子二百里男百里其實一也百里以土田言四

五百里以山川附庸言也鄉遂用貢利什伍出兵以戰也都鄙用助利八家望助以守也侯國皆用助管仲內政乃變焉夏人五十畝佃半休半也殷七十畝休三分之一而佃二也周百畝全佃也俱入田賦考 教二子距躍諸法 食年九思母在城不得侍泣下 思咨人難受人情懼報也節士難受人情恐浼也貪夫易受人情懷惠也在夫易受人情不檢也聖賢不拒人情以中也 鄭長民問律呂答之與之樂錄 呂異品來拜言射法劍術已再拜求言先生不答 自勘前著射法未善也殷之更著學射式云身端體直用力和平拈弓得法架箭從容前推後走弓滿式成神射子的矢命于心精注氣欽內運外堅前固後撒收弓舒間 自歎衰疲昔年盛暑能終日衣冠而今不勝也 與方靈皋書畧曰三代承唐虞之法于民擇聰穎者爲

士使之學于學中就樂正大胥習禮樂射御書數之藝而卽以此供于臣弟友之職全仁義禮智之性分名而一事幼學以此壯行以此虞書周禮學記文王世子諸篇可考也論語孔門弟子問仁問孝問政由求赤應知以禮樂兵農孔子自居好學而其所學之文朱子解曰詩書禮樂射御書數孔子亦曰文之以禮樂正所謂博學于文約之以禮也博文卽格物也約禮卽將所學之文物而實體之于誠正修齊治平也至于誦詩所以習樂讀書所以考政總末有如後儒躬率弟子今日講何經明日背何文專以靜坐讀書爲學者也自秦火後而學術剗然一變古聖口傳身受之實迹無從授受不得不尋之載道之籍所謂經書者旣尋之經書遂因而行習少講說多陵夷以至五季程朱諸儒出慨然欲任聖緒而沿流旣遠尋源爲難于所謂存心

養性者又難以靜坐內視浸淫釋老將孔門不輕與人言一貫
性天之教一槩乖反處處談性人人論天而外以孝弟忠信爲
行註經論道爲學獨于孔門之禮樂兵農執射執御鼓瑟會計
忽焉不察以爲末務又諉之于小學已失而遂置之以空虛之
禪悅怡然于心以浮誇之翰墨快然于手目明之末也朝廟無
一可倚之人天下無復辦事之官坐大司馬堂批點左傳敵兵
臨城賦詩進講以致天下魚爛河決嗚乎誰實爲此無怪顏先
生垂涕泣而道也 以三弟請毋入城不時往省供養物 讀
風雨賦備占也 思井里不分凶災不備寄生之民也學校不
舉禮樂不與倖生之民也 爲中元祭齋僕來言旗地事心遂
不純力却之歎曰齋日一事不可入耳目如是夫 訂平書竣
每卷後有考辨名曰平書訂一分民分民以士農工商非此者

除之變之合民以十家爲甲十甲爲保十保爲鄉鄉之長有正
有峻有巡五鄉立一公正皆以士皆爲官一分土量山川邑居
分邊腹郡縣而重權久任一建官自縣公正六衙以至府部院
衙以一途爲陞降不以他途雜之別賢否爲舉錯不以年勞限
之公用人之權于天下不以一部專之一取士八歲入鄉學十
五入縣學皆以次教之詩書六藝二十進之郡學教而試之又
進之籓學教而試之乃令成均教而試之遣之歸縣分兼科及
禮樂農政兵法刑罰藝能理財等科入六衙及令師署爲士以
士補官一制田可井則井不可井則均凡有水利皆興之一武
備農二十餘家選一兵二十應六十退再選其餘羨卒爲鄉兵
至于理財河淮刑罰禮樂則皆在六政內矣 思六藝五者皆
著有成法惟御無有因思子固泣下以曾擬共緝御法未果而

逝也 曰人兩目用左則右目注于左用右則左目注于右並
用則合爲一此以習射知之而宋人以空揣爲格物非也 思
持家宜勤儉不宜操切 思夏甚疲乏今以四方告疲且僕從
才短遂自館歸身督西成二更未寢五更卽行而身反壯甚矣
有事習勞可以養生可以爲學 聞南方有亂者敗亡呂晚村
之門人也冒道學而負時文謬遂至此幸早辨其妄斥而遠之
也 鄭若洲中舉人來謝教刊先生古文數首 著學樂卷三
一辨遂色七音當以四爲宮爲中聲不當以合爲宮一辨宮之
商宮之角爲宮商之宮角之宮爲商角以隋唐金元六宮七宮
等調觀之可証一辨采舒宗管子先益法以合爲倍徵數一百
零八四爲倍羽數九十六則宮非始音黃鐘非首律矣一辨十
二律卽具正清采舒謂十二正聲外又有十二倍聲十二清聲

是三十六律矣皆誤一論仲呂蕤賓無下生卽以采舒所言生
數計之蕤賓不生大呂當三十八零而大呂在上爲七十五零
中呂下生黃鐘當四十零而黃鐘在上爲八十一是亦可見蕤
賓中呂無下生也一辨五音不移而以十二律旋宮與十二律
不移而以五音旋宮二圓一也一辨南曲所越二字是二變無
越角越商越徵之理一辨人聲不過七聲而風土稟質感應有
殊或高一聲則爲高一聲七聲或再高一聲則爲再高一聲七
聲以至三高四高五高六高而止摠合以律管而不過十二律
故先王以律正聲而聲之高下析焉 李杲侍教之曰儉于自
用豐于待人善道也今人反之卽有儉于自用者必其主刻以
待人而自儉其極也有豐于待人者必其先豐于自用而待人
其餘也 若洲曰講聖論非古法無益徒勞民先生曰然古教

民以事不以言惟讀法近講論而亦不同讀法示以當然使民
由也講論曉以所以然使民知也非孔子之教也宋儒之習也
思不入世易入世而不粘難宜慎之又慎 著學樂卷四錄
與河右先生考習諸語並歌舞諸法琴簫諸法 聞米誦貴林
然有民物之感然不以貧介介然 元英問養赤之道曰勿美
衣飽食勿懷抱嬌脆勿失教嬰孩 爲習智出束修留士宜館
自勘猖獗狂亢已之大病事不立人不親皆以此不力改則
廢才終身矣

已丑年五十一歲

儀功如常 命習仁習中從劉士宜學 鄭若洲來邀先生同
如京 若洲日行道而不辯若何先生曰不可君子得位則行
道不得位則明道不明是棄道也且世之辨先儒者在章句頗

先生所惻者在斯世斯民學術不明民物終無起色安得不辨
若洲曰攻佛不知其精不如不攻曰又不然能攻賊卽賞之不
必盡悉賊之職欵也故曰能言距楊墨者聖人之徒也 若洲
規先生語低曰謹受教規先生不謁時貴曰交接取與士之大
節此不可苟也 謂若洲曰樞天有爲聖賢之志而才短濶子
有爲聖賢之才而志游移苟無佛老濶之隱怪率之富貴誘之
志可立矣 蘇州陳純一來拜言陶甄夫之高尙王子嘉之技
擊與之大學辨業習齋年譜 楊淡園致書問學邵榮業李興
業來拜問學 李煒來拜問治謝以書生無知具啟出厚儀以
聘卻之 黃弼臣來拜問學 過楊仁澍學五步劍法 若洲
謂先生宜諧俗先生曰守道諧俗二者不容中立君子爲天下
萬世守道雖生死禍福不移也 以目昏自此不下會場而歸

田信侯書至延先生之興平任辭不往 楊慎修選富平持
其父帖及張西陸字請先生同往任辭之 思學術不可少偏
近聞習齋致用之學者或用之于家產或用之于排解少不迂
濶而已流離窮矣故君子爲學必慎其流 與辰訂半月一會
學 河南韓同甫書來問學答之 慎修又求西陸書來懇許
之慎修以幣聘求理刑名先生以商政則可專司一事則不可
以念老母年底必旋里也卻其幣金慎修又來懇先生言倩一
佐尙可乃薦文升同往 辰拜別先生曰先生西遊爲明行聖
道也寬和以納天下之士無庸辰言惟貌莊聲朗嚴謹細微再
求加意先生是之 五月一日行 待柳生以和慎修請理錢
穀者也 朔望行望拜禮 過固關自井陘口至此東西四百
里誠天險也 文升怒柳生先生解之曰常以已之有餘思人

之不足則無怨常以已之不足思人之有餘則不驕 過間喜
訪孫孝廉開緒時丁祖母喪不御酒肉嘉之問祭禮答之 渡
黃河而西詩曰秦晉連峯爭長峙剴然中斷放河流金僊高掌
驚空起尖削三指萬山頭河西一帶屬梁地嬴氏焉能出要津
自是子叩亡六國不關新衍帝三秦 二十七日抵富平主人
迎入署拜求教 語慎修曰富平亂國宜嚴然嚴不傷寬乃得
也 慎修求先生同人省 商州知州沈廷楨來拜言天下惟
先生一人自稱後學先生謝弗當問練鄉兵答之 商南知縣
于鯨來拜稱門生 把總蔡駿璫生稱後學來拜問心體答以
儒釋之分 張曉夫來晤 蘭副將佳進來拜問學 視采舒
孤子周之 張中潛士稱後學來拜問聲律答之 陸師旦西
朋戴大源梅莊來拜因同訪王孫裔子丕遇柯鳳岐山 陳光

陸向孚稱後學來拜曰自去歲得習齋年譜大學辨業于彭亭
立即知李二曲之學近禪以顏先生爲是今聞教愈有依歸矣
以學射示瑞生問如何爲大將曰心無刻不流注三軍敵人
者可爲大將矣 潛士出所論治道求正大端不肯平書獎之
瑞生問聖學俗學之分先生曰聖學踐形以盡性耳聰目明
踐耳目之形也手恭足重踐手足之形也身修心磨踐身心之
形也形踐而仁義禮智之性盡矣今儒墮形以明性耳目但用
于誦讀耳目之用去其六七手但用于寫字手之用去其七八
足惡動作足之用去九誦坐玩弄而身不喜事心遇事迂板身
心之用亦去九形既不踐性何由全此一實一虛一有用一無
用一爲正學一染異端不可不辨也瑞生諸子皆曰然黑白昭
昭分矣 規慎修勿欲速勿作聰明 慎修以錢穀交盤不清

求理辭以越俎慎修力求不得已應之 田信候差役來請不
得往 思學禮樂兵農而身無之非爲利則無用 思好矜者
中不多多則不矜好事者常不勝勝又何爭 思親 思主人
凡事托倚而爲人所忌危之務以謙以和 九江黎宋淳長舉
自鎮原千里稱後學來拜請學禮樂兵農先生曰勿獵多也且
學禮以心禮身禮及冠昏喪祭朝廟軍賓之禮分別告之又請
並學先生曰不可以身心爲主餘學一可也長舉言其靜坐被
病先生語以儒釋心性用功之殊又語以勉學聰明睿智無此
則仁義禮智皆無用矣拜受而去 思府史胥徒綱紀之僕皆
官之耳目手足而皆官之賊也專恃公而使若輩不得私必叢
怨于我矣不爲福始不爲禍先張子房其智矣乎 文升欲獨
批狀詞推之 事繁人喧而心不動 作禁婦女入廟焚香當

街看戲示 慎修禁鬪爭嚴輕生斷賭博勤聽訟減催科除強
恤弱不虧市價數月闔縣風俗一變士民建坊獻衣慎修來拜
謝曰先生功也曰君自勤惠我何力焉 慎修待先生以師禮
對同僚士民言皆稱師先生辭且以人忌屢辭出遊慎修堅留
思子堅厚我以情石門揚我以道慎修聽我以言皆有不可
忘者 語慎修曰勿喜而喜勿怒而怒勿有事而有事 與蘭
行上書勸以拊循士卒 著樂說云周旋中禮心性欽明無動
無靜惟天與借無所爲憂是之爲樂 語慎修選鄉保鍊民兵
旌孝弟重學校開水利諸政 瑞生走役來換入省遇周崑來
胡元馭 魯登闕聖居稱後學來拜彈琴先生曰此隨唐道家
操也以琴古法告之 之興平署田信侯令其四子皆執贊從
學 瑞生問賞罰恩威之道曰先嚴後寬則人厭先寬後嚴則

人怨平時之罰以公臨之而大過誅勿使怨而滋敵
中軍何百祿萬鍾大司馬居律呂聖居被之人聲絲竹
且能製器喜曰吾樂得之矣思尚學學易長舉學禮聖
居學樂瑞生學兵潛士居治平書道其或興乎尚學不見官
長一日來先生寓論易因共飯適愼修求見尚學急求避去

敘瑞生以謫達聖居以治生潛士以銳進因求三子規已過聖
居潛士言有交股一過先生拜受三原知縣顧之珽來拜知
毛河右先生尙健看報知吳公匪巷卒哭之吳公諱瀚浙江
石門人以壬戌鼎甲仕至都御史樂易而清端雅以先生學術
爲正揚于公卿朝廟不啻若自其口出也待人大小長短皆休
休容之先生嘗曰若吳公者可以相矣愼修謂先生曰四方
賢雋相會當周者卽周之勤財卽先生財也乃于崑來子丕西

朋聖居諸友皆有餽遺而慎修有過與者先生復力節之集

陳尚學陸西朋張潛上蔡瑞生周崑來胡元馭魯聖居張赤城
王子不于寓彈琴吹簫歌詩論學歡燕而罷赤城帖云是會也
奇才異技六省之士萃于一堂先生以至道正學振興後進而
且一觴一詠談笑風流亦足傾倒豪雋霞心折矣語慎修曰
倖進無功欲速多躋矜長易于見短好諛必受人愚瑞生贈
先生袖鞭並傳用法子丕與崑來論畫曰今人專講摹仿與
畫何與畫天如天畫地如地畫何山川何人物如何山川何人
物而已先生歎曰依傍門戶而忘聖道之本然者今之畫也

語慎修曰用財爲善皆有度用財無度則費不可支爲善無度
則壅不能行沈商州與朱學使軾議秦中風俗漸澆擬言于
兩院延先生講學先生曰變風俗不以諸君之實政而以空言

乎且僕非其人也。不日東歸矣。言之。語慎修以飛稟催糧

法。作富平贈言曰。自與吾友交。交情日厚。愛敬日深。

爲不廢蕩蕩。非僅禮貌之末也。吾友仁心仁政。旁羅洋溢。爲

吾黨光鄙人。以省親。將行。如遠別。因書替語。以代面談。

一戒高興。杜工部云。入門高聲。謂山林之致也。至于處世事

則斷斷勿用之。責人勿高。與已恕也。再爲存想。將行刑也。再爲

擬議。勿任性氣。致一發而難收。用財勿高。與漢高以黃金四十

斤與陳平。不問其出入。韓昭侯一敝袴。不以與人。皆英雄之宏

圖也。若漫然用財。不擇當否。雖貴無功。施仁政勿高興。如農桑

水利武備諸政。吾友念念不忘。誠民之父母也。然須酌量時可

以爲力。可以爲乃出。號令不然。言之不能行之。則無以取信于

民。卽行而鹵莽滅裂。不克有成。或興利而反以貽害。則又不可

愛人勿高興其人可愛也徐而察之平心觀之漸漸任用以盡其財不得一時相投輒驚喜非常過分相加苟非真才反以壞之或用情難繼後反致怨一戒驕奢吾友謙恭下士衣食朴儉可謂富貴中特立者然吾昨語田公子曰貴不期驕富不學侈言驕奢之易也車馬服御資子支費須損之又損寧樸勿華寧陋勿豪庫銀不可動假貸不可行何者輕用吾財卽輕用民之膏脂也不然于何出辦一戒矜張我輩居官立志爲聖賢出政效帝王皆分內也無事矜張少有矜張之意必來諛誦之口來諛誦之口必有假此中我以射利亂政者矣且我善政異人卽不矜張人尙以矜張加之以致上司不快同僚忌嫉非小故也而更矜張好諛乎且作大事者量如滄海度如山岳小善小勞沾沾自喜何以圖大一戒近小人小人貢諛以中我射利或陽

奉我陰違我或假相契合以探我我愛其熟軟喜其伶俐比其
資緣及後遠之不能近之立禍可畏也卽同輩中無所覬覦于
我者但係小人卽不樂人爲善必宜遠之一戒小術至誠之道
可格幽明此仁術至術也若說道則但可用于兵旅今日殺敵
明日奏愷至于家人父子朋友僕從吏卒民人一毫術譎不可
用也此用之彼露之前用之後必難復之使人疑我備我壞事
實多一戒奇異孔子曰中庸不可能也仁心仁政至平至易卽
至奇至變平地成天皆在其內若假鬼神好虛玄說夢幻不惟
無益且啟人疑甚不必也至于講六壬奇門南宮劍客皆殺身
禍世塗炭生民之人也甚勿以爲正術而近之一貴閒暇庸人
之閒暇怠也英雄之閒暇靜也善作事者常使精神餘于事不
使事餘于精神苟好勝喜多以致茫亂事必有誤曹公意思安

聞如不欲戰孔明所以稱殊絕也一貴有恒吾友愛民之心吾敬之理事之才吾愛之再益以沉潛細密喜怒不形得失不驚有始有卒則生民之幸矣萬勿始敏而後怠萬勿始儉而後奢萬勿始小心而後放肆萬勿始虛受而後剛愎 朱學使可亭來拜以閩者失辭未會後以書與之謝來顧失晤之故並辭講學之議言古人先學而後講後儒則以講爲學不惟墜不能抑且不願 張景蔚少文來謂先生學大而通世務深相結謂慎修曰君一刻不可離李先生然當求其大勿責以小明歲延至可爲闢館別居朝夕議政而刑名錢穀別致人則先生可安又謂先生曰慎修言先生行則泣何忍決去成慎修之政卽自爲政也但先生宜總大務今憐慎修無人旣刑名又錢穀旣謀外事又商家政非所以却嫌怨養精神也先生深感其言 顧令

以幣交如三原報之願令郊迎成禮而去 王帶存過富平投
詩云老我從遊晚憑誰辨業真十年求大道千里見斯人坐對
秦山峻行歌渭水春恍然虞夏在風景一時新龍門看咫尺懷
刺轉傍徨不入先生室誰裁小子狂蓬山青冥野日白荒荒
緩步憑羸馬踟躕下夕陽 語慎修曰易決之事必思既思之
後必決又語以嚴轉請諱書役息詞訟 林縣丞覬別儀邛之
紳士書吏投字慎修留先生勿行先生不允 十二月朔先
生行慎修厚贐泣拜出送兩衙六房三班衙役薦紳士民盒酒
拜餞遙迤十餘里至臨潼之康橋慎修欲同宿力辭令回慎修
令馬夫備三騎送先生抵里欵欵跪地不起曰上下皆知楊勤
能屈先生願先生勿虛上下之望先生諾之 接家報知二壩
皆入庠而劉壻折矣泣下 抵里知蔡瑞生自京返秦來過登

堂拜母供養老儀 餽弟侄族姻皆有物 見崑繩自淮署寄

來書曰寥寥六字合志其難惟我與君可以此心相許而燕山
楚水未知共學何時此豈尋常離索之情所可況耶弟近學易
方知聖道與天道俱備于易宇宙之事至常至變至庸至奇無
一不具于易孔子之所樂者樂以此也君子之不惑不憂不懼
者皆以此也然非孔子孰能爲後人開途而啟鑰哉夫何朱紫
陽爲陳邵所惑滿腹先天學問公然尊異端而倍孔子闢邪說
而亂聖經顧乃俎豆聖廟爲數百年儒宗率天下後世叛孔子
之教而不知豈不可爲歎息痛恨無怪顏先生謂程朱之道不
息孔子之道不著良非過激而云然也然就易以論伊川縱有
不合猶依傍孔子而爲言未嘗敢將孔子之言闢倒而別立一
說以駕乎其上如朱氏也弟著讀易通言五卷句句與之辯正

使人曉然知其爲異端所亂庶幾邪說息而經可正也恨不與
吾兄以商質之今日舍進德修業更無他學進德不外敬以直
內義以方外業則六藝既夙未一學亦惟讀書但書不在章句
讀不在佔畢耳所恨者時過後學獨立無友二者兼之不比吾
兄學旣成而門戶旣立也亦惟心竭餘年之力隨其所造而已
命辰教其子侄羣從有不能而修金者代出之

庚寅年五十二歲

儀功如常 知慎修有悍僕譖于楊太翁乃令馬夫返辭不往
辰爲先生修年譜 日侍母甚歡 聞公度卒哭之公度諱
中寬蘇人性寬厚讀書疆記雅重先生之學已未進士仕至戶
部郎中 二月慎修差役持血書來請云三月初旬不到卽以
死殉言甚悽惻先生不得已復往三月初七至康橋富平紳士

來迎至寶村宿役民以班來叩慎修率紳士隸民跪謝罪求教
請入署 入省晤叅領馬呈圖總督筆帖式郭鼎三鼎三日讀
顏先生及先生書聖道如日月當前矣 語慎修曰小人女子
恩不能結感不能斷惡作勁敵撫作驕子是君孤立也 漢中
秦子壽來拜問學過梁質人言甘肅道茹鳳儀謀晤 富平有
謀逆經年未發者慎修密訪得實率兵役往擒之依律擬罪免
其株連 尙孚諸子及張二允周領旗蘇克憲設公筵請先生
論學 滿城旗人十餘來拜問學 瑞生問兵曰用衆以寡用
寡以衆 萬鍾請筵與瑞生較射演技擊皆絕藝也快之 少
文爲慎修延錢穀幕賓王暉文路病至富平卒先生出吊之檢
其遺書擬師事先生以共成慎修之政者也先生嘆曰天不欲
慎修有終而使我不久于富也可違天乎 慎修延達紫旭至

先生語以聖學紫旭躍然曰吾向疑天下如婦人女子今乃知學術之失也看平書訂曰太平在是矣 五月文升去慎修進
黎長舉司刑名 謂長舉曰君子耳目之學未也古人明四目達四聰視思明聽思聰不聰不明則諸事無能爲矣長舉曰淳嘗以靜坐致病其靜也有言不聽人來不視曰此異端所謂黜聰墮明也達者察言觀色非于視聽用功乎 覽宋儒書朱晦庵晚年悔講學多常靜坐陸子壽兄弟晚理會講學示長舉曰子視宋儒進退爭辨只此二者請問周孔如此否經書有此學問否長舉曰曉然矣 先是先生與周崑來札求爲寫照子不見之曰何必崑來我爲先生寫矣于是寫十易稿乃登絹名曰遠道圖 瑞生曰麟觀先生處事未事不粗忽臨事不忙迫過事不遺忘一日而數變久遠如初勤大畧克舉細瑣不厭教我

矣 慎修商徵收先生爲立法與甲長一甲單催戶頭戶頭一
戶單催花戶皆開列糧數使花戶盡知不到乃發木皂不到乃
差鈎枷號完銀始釋蓋去坐差比花戶催科善策也又曰精明
嚴慄則法行不然不如仍舊 思去作詩曰舉世乏人材焉得
不長歎錯薪羣已矣翹楚亦徒然檮穀臭自染蘭蕙質無堅崑
岡與溟渤會投以塗炭安能乘黃鵠萬里一高騫又云人生少
知已自古而已然張竦與陳遵氣稟各有偏顏淵違一閭焉識
大聖全父子兄弟好各懷各自看但能果自知遠大遂可肩仲
尼無奈何歸之彼蒼天 著以 御騎法飼法相法得之瑞生者
也 萬鍾爲先生裝刀送至 閏七月以祝太夫人壽辭慎修
旋里時太夫人年七十矣慎修泣曰歸祝勤何敢留但明春奉
迎求無拒恐爲所牽姑應之 之興平率田二生斌入省學射

之商州嘆商洛天險沈青山間先生至出迎入署晤陶甄夫
甄夫出所著熊襄愍傳言殺襄愍者道學鄒元標也先生因嘆
道學不能辦事且惡人辦事 青山留先生居商講學辭之執
贄令其子永言侄素存從學辭不獲已受之又餽贐辭之先
生贈甄夫玉帶甄夫報以核桃硯 返長安餽采舒孤子以金
蔡太翁以養老物子丕將葬母賻之以金 出與平送祝太夫
人壽幣及騾一受之 瑞生送祝壽王扣及騾一義徵鼎 各
有祝壽儀皆受之 諸友送至省城外餞別瑞生又遠送數里
登高阜望先生行 却寄諸子各有規勉 陳子章送祝壽錦
言及廣藥受之 慎修以事復求先生入省以將別許之 瑞
生復聚諸友燕談諸友又送至龍首山皆洒泪而別 長舉送
壽言拜祝餽贐辭之謂曰子一練刑名一以禮範身心一倡明

聖道一詣世故人情可矣勿他營也 達于旭至以其曾佐兵

事問之紫旭拜求爲其父作傳許之作遂副將傳畧曰副將諱

友書郡縣人明季陝西流寇四掠殺其父友書揮戈號泣散家

貲募鄉兵手殲其讐副祭父墓釋兵已而流賊愈熾鄉里公請

友貴復統鄉兵擊賊屢立功洪承疇奏聞置麾下官至副將行

總兵事同左良玉曹文詔討賊鳳翔曹左皆以歲寒賊強難以

猝勝友貴獨決進遂以奇謀得勝賊潰賊據方山者甚固友貴

請于經畧持尙方劍督進擇尤險者自當之遂關方山 清兵

入乃棄衆隱洪承疇招之不超子宸亦知兵吳三桂呼問其名

虜去間道亡歸吳兵由鳳縣至斜谷皆得之冷將軍問計于宸

時關口在谷口揚兵宸曰緩我而懈彼乃可攻也乃半月或一

月一陽兵至十二月除夕帥師直入谷口復遣奇兵從間道設

伏大破之復地三百餘里吳遣重兵屯夷門鎮口畢將軍移兵北原避之請宸聽其計宸乃捉土人詢路遣兵遠出夷門鎮口後伏焉又遣奇兵從上流淺處渡登夷門口西山而大兵夜渡渭擊之合戰兩路伏發賊遂潰奔及三藩平上功幕府宸曰吾父以報父讐不終其官吾可以佳兵官哉亦之郿縣山野隱焉宸以有異術致風雨驅邪魅問于人及見之退然儒者也聞聖道伏地願學且歸以訓其子孫是豈一技一藝之士哉以其知兵有家學故爲其父傳而大畧及之 語長舉曰宋儒內外精粗皆與聖道相反養心必養爲無用之心致虛守寂修身必修爲無用之身徐言緩步爲學必爲無用之學閉門誦讀不去其痼盡不能入道也 慎修遙拜太夫人壽供金環彩緞並餽贐受之 八月十六日起行慎修命隸黃天順民宋顯秦送先生

至里前任劉令三原顧令俱來送兩衙餞送蘭王諸紳衿餞送書吏鄉耆餞送三班叩送愼修與顧令有公審事辭令回愼修泣拜囑以復來先生亦悽然囑曰君凡事小心勿信宵役勿虐家人勿瀆上司勿易事求奇勿難事沉閣紫旭長舉送至康橋辭回愼修遣馬勸王永長一路備中伙送先生渡黃河凡愼修送役回者皆犒以儀渡河令永長回又字達愼修曰勿致虧空勿敗素望 過太平作書與王元亮語以致仕宜倡明聖道路遇馬良持三弟及辰字言楊太翁聽讒有言先生正謀不復而難以爲辭也乃遣黃天順返決辭不往 九月七日抵里拜母供錦緞諸衣與四弟褐及裘親友當餽物者餽之 十一日祝母壽列諸友壽言于堂上率諸弟子侄稱觴拜祝環侍 遣朱顯泰回顯泰知先生必不往也叩出哭泣而行先生歎曰吾

觀人情而知王道之易易也其如命焉何哉 鄭若洲問曰自
反而縮者堪自信也先生曰未也 若荆卿等皆堪自信然非
曾孟之縮自反而縮卽集義也 教二子曰子弟不可積私財
有私財則于父母分畝此將致不孝兄弟積財不一或有覬覦
起爭奪將致不友不恭命內子將二子所得賜資盡入之公
爲習仁講鑑至禹一饋十起一沐三握嘆曰周公一食三吐哺
一沐三握髮孔席不暇煖墨突不得黔聖賢之身勞事迫皆如
此也宋儒乃曰六十七無事客閒來無事不從容則別一虛
空境界非儒道矣 自勘有一身之事考察身心也有一家之
事農圃居室也有一邑之事鄉黨應酬排解也有天下之事賢
哲結納友朋講習也有一時之事苟得議政去甚救弊也有萬
世之事著書立言以明學論政也諸事蜎集孱難任惟期持

之以敬耳 孫子未典學貴州托一劉生寄書候且有餽金劉
生送書至則金已用矣辭慚而費先生曰君鄉里也君乏而問
我適遇我有能不借子乎何以歎爲 思酒色財氣性也有命
焉且不能與吾身終始者也何者病則不能寢則不能未亡已
亡者也仁義禮智命也有性焉乃與吾身相終始且存固與存
亡不與亡者也何者苟能全之其功被萬世其道傳無窮也
先生在秦易州知州趙山公餽金幣曰佐先生二子讀書也至
是如易報之 入京還郭宏銀五十兩宏曰先御史未有遺言
想餽先生者耳先生曰此尊君代子償人者也今汝家寡婦孤
兒我可弗償耶卒與之 薪輔弼臣延至其鑾儀衛署內下榻
問學答之馮欽南過問事 疑言家庭亦重勢利可傷先生曰
在我不可有勢利之心耳若家人以勢利感動之亦道也古人

富而後教又曰權者德之輿夫嘗不該家庭于內也 劉百斯
郎中居母喪踰年猶不食酒肉不入內幕之 十二月先生爲
習仁加冠辰爲家字之曰長人 思昔年煤毒部問二事心夷
然不動以爲學問所就今回勘日講當時大本未立蓋自認
因悟庸人平常心亦不動遇險巨則忙亂然遇險巨心能鎮
定在平常乃多出入若動亦定靜亦定常亦定變亦定者乃聖
賢之存養也 邑令陸公問政曰政在三嚴嚴屯駐嚴盜賊嚴
吏役 謂門人曰吾心不好思靜澄于中名理自種種環生又
曰辦天下事必耳聰目明心睿吾嘗自愧愚柔然於見一人卽
測其底裏隔室聞人語卽料何事凡行一事必要其起訖不能
如劉劉一步十思而一步嘗二三變解有志者不歷此境終無
庸也

續纂李恕谷先生年譜

恕谷先生年譜自庚寅前爲同門馮樞天所纂其後爲劉邦司所纂者先生病中及日譜三卷失去庚戌春先生詔贊來莊教其季子比秋先生爲制臺唐公藩臺王公聘入上谷修通志囑贊續纂年譜乃自辛卯至甲午無日譜者按詩文稿錄其大畧乙未後則按日譜酌修之纂訖再拜言曰年譜者恕谷先生之圖像也繼往開來之轍迹也後學之標準也假堯舜禹稷不有尙書則放勳重華之德治水教稼之績泯矣周公孔子不有周禮論語則豐岐之治洙泗之教湮矣子與氏不有孟子七篇則仁義道德衛正閑邪之言蔑如矣顏習齋不有年譜四存則好古力行論性辯學策治喚迷之傳無聞矣烏覩所謂萬世永賴繼絕學開太平者哉恕谷先生傳習齋之學承先聖之道著述甚夥而生平行止進修之實

恕谷先生年譜 卷五

概載年譜贊之所以亟爲纂輯俾讀之者見存心養性之功而皆知所以正心見飭躬寡過之學而皆知所以修身見閑家佐政之幹濟而皆知所以齊治見明道辯學之論說而知前聖後儒之分途見孝友睦婣任卹之躬行禮樂兵農射御書數之傳習而知四教三物之切實而有用于以質之堯舜周孔孟子習齋誠異地而同揆也聖道不墜斯文在茲天下萬世胥于是譜爲表正矣所關豈不鉅哉謹敘

雍正八年歲次庚戌中秋洛川門人劉調贊頓首百拜撰

李恕谷先生年譜卷五

威縣門人劉調贊續纂

孫 錯 重加修訂

辛卯年五十三歲

康熙五十年
口譜失

儀功如常 與王崑繩書曰天壤之大惟我二人聖學王道可
共商酌而炎南雪北一別數年每遇可賞可析如芝顏當前不
能作語馬首正行遙望一人貌似中郎加策赴之乃又非是悵
悵何極道駕想尙在淮安公子尙在金陵近况勝否堪比歲爲
楊慎修所敦請西行幸其虛懷聽受甚獲民心關中學者頗可
晤語上而當道下而草澤皆有虛佇吾道粗明粗行兩次東旋
官紳士庶送者填塗遂欲還家苟全終南但慎修少年恐不能
持久又其庭幃乖離故今歲歸決不往矣易解可示下承翰教

虛懷受言敢不佩服我兄弟年亦老大矣衰至而驕何常之有
望彼此共策益拓度量遂涵養改過取善雷行天覆不然學且
墮落不惟愧負天地聖賢亦吾師習齋之罪人矣先生後自記
云聞崑繩庚寅秋棄世則是書未之見也悽然 與趙易州書
榎楠杞梓不爲校以椽礧吳鉤干將不利及以礫鼠長人巨公
不怒而與雞聞犬搏苟惡其人而校之則我與可惡之人齊分
矣卑其人而校之則我與可卑之人等量矣君子其高如天物
雖觸之無及者其厚如地物雖撼之無動者故無喜無愠子文
稱賢見善不喜見惡不怒武王誦聖 三月清明祀先告曰祖
鄉被圈後湫隘之甚不能容堦兄弟五股堦請奉母移居齊家
庄學農圃以謝世務以奉先傳遂移于庄居修屋理農紀以詩
四首其二曰就西新闢一書堂換頂更塗舊草房虎落編成柴

作壁龍鬚鋪好堯爲牀南川帆雨侵窗潤北塹花風人座香
黨能來攻禮樂便堪白日到羲皇

壬辰五十四歲

康熙五十一年
日譜失

儀功如常 易州祝兆鵬以雲南知州受知于總督劉公蔭樞
時得顏先生及先生著上劉公劉公亟稱許遂識于心至是歸
京補山西忻州知州遣其四弟來問學且具儀鵬先生主其幕
事先生以親老辭問習齋尙有他弟子乎先生舉張文升及三
弟益溪乃延文升主幕益溪設帳而西 祝兆鵬之岳丈張以
部郎放濟南府知府使來餽贊求理其幕事詞甚懇切許之乃
以十月東行過德州李龍友來拜在李翰林園置酒高會德州
諸士至武定州拜李相國公子入席未終公子叔父五老庵來
曰孩輩不足語請下榻敝齋遂邀以往住四五日爲言張石民

來儼若行蹤且言儼若貧病乃修書與之畧曰唐人之病酒色財而已豪傑之病則一在曠懷天下而不恤家計一在憂世而不樂天二者皆足致病昔人云如此爲病不如此則爲藥又與張石民書曰山左人物惟聞先生一人好學能文心羨之孝友一堂心羨之高尙不入塵俗倘伴山水心又羨之此亦今之威鳳祥麟矣然又聞先生談理學不知剗剗修飭獨善而已乎抑尙欲繼往開來任世道人心之重也今海內乏才聖緒將墜非先生挺立之人孰能任之特寄顏習齋先生傳一首拙著一本以爲乘章冀他日相見求教共訂千秋之業也 十一月到濟南太守延入署觀其署事知其非能有爲者乃決辭而歸

癸巳五十五歲

康熙五十二年
日譜失

正月以周易傳注久成入京尋剗剗刊之作序曰易爲人事而

作也孔子于大象如天地健順雲雷屯難而必曰君子以之又
曰易道有四以言以動以制器以下筮又曰百物不廢懼以終
始皆人事也予癸未註易至觀甲申春李中丞斯義下榻京師
註卦訖秋又自訂于郾城溫令德裕署丙戌註繫詞傳說卦序
卦雜卦迄壬辰重訂一周嗟乎易入漆城乃二千年于茲自田
何傳易而後說者夢如而視其象世忤微其數穿鑿按其理浮
游而尤誤者以易爲明天道之書于是陳搏龍圖劉牧鉤隱邵
雍皇極經世並起探無極推先天不惟易入于無用而華山道
士青城隱者異端隱怪之說羣竄聖經而易之不亡脉脉如綫
夫聖人之作易專爲人事而已矣何以明其然也乾坤索而爲
雷風水火山澤本天道也伏羲因而重之何不每卦皆言天道
而蒙需訟師謙履等名卽屬人事文王彖詞于乾繫以元亨利

貞猶天道人道兼言也至坤牝馬之貞君子攸行等辭專言人事周公象辭則潛龍無用利見大人朝乾夕惕無非人事者以下六十二卦言人事者無論如復姤泰否明屬天道而利有攸往勿用取女小人大人必歸人事乃知教人下學不言性天不惟孔門教法也自伏羲文王周公以來皆然也予弱冠受學于顏習齋先生不言易惟以人事爲教及壯遊見許西山先生頗言易卦象數謁毛河右先生剖辨河洛太極及歸而玩易卦象爻象一一與習齋所傳人事相比乃知習齋不言易而教我易者至矣故少于易僅一覽長又無能誦讀而日註一卦騖然若解三弟培同邑張綸石門吳涵德清胡渭生大興王源金陵王元衡太平王與曾武昌陶竄塾屋陳光陞武定李之藻或以爲是或以其學亦庶幾有合于人矣夫天下萬世猶吾身也意欲

再訂三訂以公之斯世以其期寡過其力經綸或亦仁人君子之所許也 與鄭若洲書曰客冬聚訂周易賞奇析疑千古樂事獻歲乃剴然得聖人作意本旨專爲人事已爲序顏其上回思足下高明頗嗜奇乃論易惟主庸常稍涉纖巧高遠者卽芟除固天分之卓想四聖人之道原不可過誣也自此太極圖諸說吾知足下洗而正之不難矣自顏先生去後提誨無人血氣漸衰夫身猶器也自勘舊矣舊則不新舊則將盡且愧且懼近與樞天約日省月箴勉圖晚進足下近深於易擬鈔拙著時常披吟甚佳然猶望鼎力於操存省察有所持孝友禮樂有所課遷善改過不但爲庸近無甚罪戾之人而止則以於易以窺觀測之與以深造得之者其淺深當有逕庭也而於衰夫亦庶幾有助焉 仲夏東庄卽事詩云柳蔭堤頭坐風來萬里涼麥壩

晞早露鶴陳亂斜陽爭席村翁慣荷竿海鳥忘商山有四皓何
自識張良其南原清曉往步屐意遲遲高木纔實霧新苗半扇
苗久無開口處惟有會心時大路當前在歸來示兩兒其二鄭
見百請至棗強同馮修五張瞻仰單侯摺集素景園詩云連厦
堪遮日深林易得風池欄開綺席客榻見羣公雨洗天爲碧花
臨酒亦紅無窮今古事隨意付杯中

甲午五十六歲康熙五十三年

日譜失

春同邑進士王之臣太倉王相國所取士也自京來傳相國論
將薦先生學行手

天子先生具書力辭 李翼公之母

國初被掠遼東翼公入遊百計贖之歸先生過望之贈以詩曰匹
馬風沙路來過孝子堂客年傳庾愍今日見王祥泔水三牲饌

鮑墟百歲觴

孝子鮑人住鮑墟里里旁有米泔河

萱帷夢裏笑不復在遠陽

邑

令浦公新下車卽來拜求教先生告以禁賭博戒雜票其所延西席惲臯問孝廉武進人也素聞先生學因過請教乃以顏先生年譜四存編示之撫掌稱是遂盡棄其學而學先生六藝之學立日記以省身心且招先生長子習仁入署教之讀書寄先生書曰承惠顏先生年譜四存編及辨業學規敬展讀畢爲之心開目朗如霾霧豁而天日皎也如臍得浴如塵得刷而身爲之輕意爲之爽也先生之教我深矣苟有識知能無感而佩乎所痛沉沒時俗途窮日暮聞道已晚用自傷也家世以制義發科生不知學爲何事涉筆爲文卽得父兄稱賞輒自矜喜所遇明師良友勉以讀古書攻詩賦已爲超時出俗之學此二十以前之一誤也旣爲諸生家益落假時文章句爲人師年益長志

科名益急務制義益精掇拾諸儒性理語止供時文用而無暇
體究也此三十以前之再誤也旋遭室人之變貧困凄寂夙妄
自負抑塞莫伸遇方外人作奇笑語似若可喜遂甘心焉而禪
宗公案棒喝拈提頗有省會愈增其妄返觀語孟都作妙義玄
言遂徵昔人學佛然後知儒之說此三十以後之大誤也而從
此亦喜觀陽明心齋近溪諸語錄竟以爲真學如是耳其誤益
堅而見世俗專尊程朱因取而觀之見其言近於篤實而亦自
悔從前妄誕之非九服膺主靜二字以爲聖賢的旨而深愧未
能也然生平讀書頗善疑見宋韓范司馬諸公聲光震煜居然
大人而國勢厭厭日就迫蹙以成靖康之禍竊謂西賊破寒心
膽之謠中國復相司馬之戒直是當日諛詞全無實驗而見朱
子每過稱張浚則大非之以爲交其子而諛其父遂亂天下是

非之實大違三代直道之旨而性理載其以岳忠武爲太橫秦
檜能錄用舊儒後人憤然曰私意如此豈望賢之言乎夫儒者
之盛莫如宋國家事勢之孱餒朝廷名義之汙辱亦莫如宋每
疑而怪之然以世俗所尊信且自愧未臻諸儒學力之所造又
見其著述服其宏博愈不敢議今讀存性存學編及辨業學規
而知孔孟之真自有在也而知宋世之不振皆學術無用之故
也先生之教我深矣然而竊用自傷者六藝之事不特身手未
涉卽耳目亦少歷焉今年已半百外疆中乾踴踴澁縮舉止無
當於此事遂已矣不亦悲乎且前擬躬叩講堂觀禮容聽樂歌
以自澤今顧影增慚面目粗鄙語言朴率內無得於定靜存心
之力外不嫻於周規折矩之儀何以自進於大君子之前而請
其學益足痛也驚駭病骨伏櫪悲嘶不識尙可施鞭策否惟先

生幸而教之 臯聞問正心功夫先生語以心有三境曰明日昏
曰妄學者務身心一齊修整九容肅怡天君湛如積至夢寐皆
爲清醒而又學爲有用之學則聖道不遠矣 臯聞將先生著
種種訂閱鈔存

乙未五十七歲

康熙五十四年

儀功如常增衰年善忘外事一概告謝見過者或言聖道或談
農事者聽論世事及人短長勿答言請托者掩耳謝之 正月
溫益修寓蠡城同憚臯聞往視之二子皆言聞異端須先自治
天地清明則異端自息先生曰此歐陽修本論之說也非孔孟
救世之苦心也苟有用我天清地寧經正邪除安用著書立言
哉正爲道不得行故不得已而喋喋耳孟子曰能言距楊墨者
聖人之徒也夫能言未必能行孟子卽許爲聖人之徒如必待

大聖大賢而後可辨楊墨則楊墨之猖熾愈無所底矣故曰亂
臣賊子人人得而誅之辟之猛獸食人能除之上也不則大聲
呼人除之亦次也不然袖手旁觀苟幸無事心何忍哉皇聞曰
然 皇聞入京會試攜習仁餞之送至北關囑以千秋大業
註孟子 養太師母每早未起則進酒已起則進粥晨食晝
食無算 二月華州古葵季榮以詩筵爲贊拜門生詩曰越盡
關山知幾重負書千里效登龍會觀著作驚滄海願接音容仰
峻峯半世韶華悲齒馬一生事業守霜春深知道德源洙泗指
我岐途歸正宗乃令居東莊新舍供柴米令其自覓學禮讀易
季榮問學先生教以存心修身之道因告之曰學術不可偏
偏於立體必統清靜空虛爲異端先儒已嘗其弊矣偏於致用
必流雜霸伎克爲小人今日宜戒其禍焉 語季榮曰世俗有

三借口一曰不拘小節借口小德出入也一曰脫畧借口斥繁
緝也一曰率真借口於不假也然自居不拘小節勢必大閑亦
踰自居於脫畧勢必坊表盡喪自居於率真勢必真不孝不弟
亦以爲勝於假孝弟矣自然之勢大壞世俗者也 五月憚臯
聞以從先生學未結應保定軍廳李僕崖聘來府寄書曰在臺
得奉大教始知聖賢學問確有正宗確有實際豈非一生至幸
京中頗有相維繫者又有厚脯相啗引我遠遊者而鶴一聞保
郡司馬之招躍然必赴誠以所學未堅欲稍近於先生庶得時
聞訓誨也 十五日大病臥倒服藥稍起至六月初七日先生
二弟德吹以病瘟卒於曹家簾三弟益溪以先生病未愈不使
知先生視習仁面色有異力問之乃知大慟卽入鄉哭之一切
殯葬事皆任之益溪以河決而鄉中無先生養病處力勸視

吹斂回莊 自書於壁曰斷欲勿言人勿躁勿言人短長力殫
聖道表裏並盡 語季榮曰子與武遠然文武皆道也關西用
武之地多武人亦當知之季榮請命 季榮問禮先生曰時禮
則非禮勿視聽言動是也日禮則屢起揖尊親先聖是也月禮
則朔望行禮是也年禮則時祭節令等祭是也何一時無禮者
又問性好簡非乎先生曰居身治世皆以簡所謂行簡是也光
武去繁文至什不存一苟或以繁禮多儀爲戒可見也子之好
非簡也好靜不好動好無事不好有事此則宋儒惡辦事之習
佛老耽空虛之染也與吾儒居敬行簡何與吾儒之學在時有
所事物不用則壘人不事事亦盡論語言請事孟子言必有事
是也 八月季榮謀歸乃餞之餽贐季榮拜別痛哭書先生曰
記云先生憂勤惕厲之心孝友仁愛之事英實親見是以敬佩

在心侍坐時嘗自愧不能出一語但以先生勤勞過甚思以惜養精神爲勸不知是否先生曰謹受教贈之以序 惲臯聞書先生日記曰近有毀先生於予者予曰久不相見聞流言而不信古人之交也況常相見乎毀者遂止然亦見爲君子於此時此世之難或者先生惡惡太嚴不見和於流俗也先生拜受

十一日太師母初度臯聞以詩幣祝同鄉客燕之 臯聞問曰錢亮公謂書可疑者甚多如盤庚專言鬼神大誥專主卜筮豈無道可以驅臣民耶先生曰此誠先王諭民之道所謂民可使由不可使知也後儒於民動輒言理言理之所以然以鼓舞之而民愈頑愈梗乃於先聖之書遠若河漢矣臯聞曰一經指示便覺釋然蓋齊治平之道有萬不能求盡者而其道已盡也

二月朔公商擒盜先生寄字曰所捕諸盜非上司案亦非有

人告發乃賢侯弭盜安民至意但審不枉即可法處不必盡起賊令其扳累無辜也

丙申五十八歲

康熙五十五年

儀功如常 二月學院張天門校士保定習仁往應試取入府學第四名先癸巳年夏旗人張萬載持馮衡南書來拜在保定寄書先生曰衡南不通時事所交未必端人也已而一日薄蔭至親躁妄坐卽問兵先生曰不知也少以貧視食爲從遊講孫吳此教學故事何以言知兵今老矣諸學俱退而況於兵乃出其論通鑑兵事者求閱先生閱數行卽置之曰近多病不能看書不解也固辭之退次早張強鄭宅車來接先生言往治病遂行張乃去客歲其僕首其有異謀之言刑部並九門提督審之張供交楊仁澍因仁澍得交先生及王子不又言先生相才子

丕將才提督彤公刑部張公逮仁澍至澍曰識則有之不知其
他至於李某醇謹儒者斷不與若交也二公素知先生不之問
惟遣官至陝西逮王子丕至訊之今年乃定爰書張死罪楊王
俱發關外先生自去歲知之恐人震恐不言惟語長子習仁至
是習仁在保定應試聞旗士崔貞若言事結先生如府往見崔
問故崔言仁澍詞甚昭雪後先生爲仁澍立傳曰楊仁澍者八
旗之內務府人也少有異才不可一世吳藩之變遣出征仁澍
曾讀欽飛經能五步劍法有軍功與一官辭之退磨筆帖式大
書其門口四海有天皆禮樂九州無事長兒孫又題其座齋曰
人皆欲殺眞才子我見猶憐是美人聞堽入京來拜咏牡丹詩
以贈曰傾國傾城莫浪誇雲邊皎日月邊霞姚黃魏紫親曾見
天下春風不是花後一妾人張萬載福建巡撫張某之子也其

父以罪死僕告萬載與人有逆言發九門提督龍可多審問曰
女識多人乎萬載對以識仁澍因仁澍識蠡縣舉人李某提督
喚仁澍訊萬載言有平仁澍對曰識予有之以皆旗人也若李
孝廉則漢人且素學道端謹斷不與萬載往來也刑訊仁澍堅
供不變提督乃逮他人問而削堦名仁澍發關東竟牽累以卒
李堦曰人之相去豈不遠哉人率貪得而吝施與仁澍反之有
與無取晚年名重天下凡有學問人入京無不過從者仁澍開
筵置酒錢盡至典衣被不少惜其往來艱行李且爲經畫之而
故人同學者位躋尊顯餽以財不受雖二三金亦力却誠曠世
一奇人哉乃與堦交斗過變更不自釋其禍而忍刑以釋堦之
禍每思之輒感雪泣矣 學使向浦公言存注先生意浦公欲
先生往拜之先生曰學使取長子習仁入泮而往拜之使示人

私也不可 畢聞長子憚宗恂廉夫具贊拜從遊 三月使習
仁將車如鄉迎太師母午至迎拜候安因思母惟惓惓五弟子
女愛之助之卽所以孝母也 寧夏監屯同知白訥梅溪倩寧
夏守備白靜庵以二百四十金爲贄來聘先生辭之復以書曰
不佞少年頗有四方之志今顛毛種種俱付之灰燼矣乃蒙明
府以未會謀面之人三致延聘且向舍親云李某才德我稔知
之豈前榮任乾州與富平隣封於不佞之佐楊令者謬有傳聞
耶楊令初年原有卓績乃其天性好善非愚菲材所能助也况
今老母年迫大耋愚選期在卽尙躊躇不能行何能遠涉西陲
以窺高深搢衣報誠容候後時耳隆貺壁上 四月憚廉夫來
先生語之曰子不患不通達患不誠篤至誠之道可以逢時何
者物以少爲貴衆人誠而一人詐則詐占巧衆人詐而一人誠

則誠共任也可以免禍何者火燒崑岡玉石俱焚人謀何施積
德獲天或可必於冥冥耳廉夫行因舉廉夫之少年馳驅以教
諸子 註詩經思易奇而法詩正而葩昌黎知言哉 五月阜
岡來言將解館南旋先生聞之悵然若失爲作贈言曰昔子路
去魯獨顏淵曰何以贈我顏淵曰何以處我良友相別必有贈
言古道也今阜岡先生南旋驟聞驚怛不祇如失左右手乃如
失吾心忡忡惓惓拜而求所以處者狂瞽先賓冀獲重報獨善
非士也獨善士之不得已也何者四民如農易田工成技藝商
通有無皆可獨善而止士則享農工商之人而儲之以脩己治
人者也故孔子曰隱居以求其志孟子曰居仁由義大人之事
備先生於立體致用之學已燎然矣從此日邁月征履順獲友
自將安驅而至卽萬一遭拂逆及介居塊處并謗論紛然亦必

特立不懼確乎弗拔孟子曰萬物皆備於我矣先儒曰爲天地立心爲萬物立命爲千聖繼絕學爲萬世開太平士之職原如是也一有移易則有愧於士矣邈云聖賢然士之獨善亦有道焉孟子曰窮則獨善其身學者未能進用則爲下其分也言語訥之又訥交遊謹之又謹固宜然獨善者謂不見用於世不敢以善概責人耳非自置用世之學於弗問也韓昌黎曰動而得謗名亦隨之其卽孔子所言善者好而不善者惡乎堪嘗以此自勘觀人以孔子而尙有毀者有欲殺者苟其人無往不合非鄉愿則脂韋矣孟子曰誠無不動而人皆曰否必垂戾或無實矣好惡交至士自應爾惟是好之勿喜愈加戒懼惡之勿嘆卽自省勘則皆我師耳先生近者存心養性甚密何以益之曰熟熟則天君泰然百體從令愈戒慎恐懼愈坦蕩自得前儒所

謂效驗卽是功力亦有以也聖門視聽言動以禮卽約之以禮也卽文之以禮樂也千古聖學盡於此矣先生見已甚眞行已求力芹曝無須再獻者 易曰寬以居之子張曰執德欲宏以道言有一端又有一端無量也以學言進一格又一格無盡也以觀事言此亦一是非彼亦一是非不可膠也以待人言我之大賢何所不容不可隘也故辨淄澠則毫釐必分納百川則清濁并滙胞與爲懷則悲憫時貯於胸虛舟自處則喜怒久絕於色高明其效天平博厚其法地平願與先王共力焉會友輔仁君子皆然况今斯文移而之南識見志氣犖犖者菰蘆中必多其人先生此歸倡明聖道廣之於人周孔有靈實式臨之 思臯聞不已臯聞者可與共明斯道者也臯聞去學益孤矣當勉於獨立不懼 思武氏朝考董采等大嵐之變與張萬載雖皆

謝之形迹分明然遂脫然事外不可謂非神明之力也須使此
身無負神明 思無實之名深恥也當木然如愚 與三弟益
溪書曰近註詩已至小雅乃覺四始面目斗開朱子於風概入
懷人思婦於小雅盡歸燕享酣歌將王者禮樂兵刑之迹誦之
可以達政能言之道一概忘却而詩爲無用之經矣吾弟幾時
可來以共訂之也臯聞南旋爲之悵然目下人日變化爲猷猷
之勤爲鬼魅求一共肩聖道者安有哉安有哉計惟有效習齋
晚年獨立不懼而已斗齋終日長揖古人商榷萬世可歌可舞
毫不知愁悶爲何事也天時人態聽之而已 思人世之傀儡
日增吾心之性天常定 臯聞札來言前錄先生中庸講中立
不倚語甚警切自省全是依傍犯六極弱字近思得倚亦佳倚
仗聖言如盲得引倚仗賢師友如痿得扶此來獲見先生一言

一行可以恃之不疑但恐倚之不切實耳 先生書壁云高令
暴躁予之大病不改之非夫也 十一月部文提選知縣稟太
師母以不往太師母命往入城商之浦公浦公亦勸往令吏房
起文 教習仁以勿傲富貴曰傲富貴非中也易曰崇高莫大
乎富貴周公有貴貴禮孔子敝冕衣裳可見也

丁酉五十九歲

康熙五十六年

訂一歲常儀功元旦清明七月十五日十月一日祭祖考元日
元宵合祀五祀臘月二十四日祀竈齋戒二日戒不飲酒不茹
葷不入內不與穢惡不問疾齋靜處思神沐浴更衣朔望拜獻
家祀五祀拜母入學拜聖人受子姪弟子拜夫婦行禮夫再婦
四妾惟答揖日問母安一揖揖先聖習禮樂射御書數不拘日
以耕田養親爲務以勤儉寬和爲課以行道明道爲望日必澄

心日譜時下一圈暴怒則黑其上慾念則黑其下失言則黑其左失行則黑其右每月下必書小心翼翼昭事上帝二語以自惕勵肥鄉白宗伊任若習齋之門人也去歲以貧北來先生率同人助之又來又助之又來先生乃與之資使賣筆爲生遂出遊四方能舉顏李之學告人人聞多有興者今二月又來先生與言聖學長人在旁聞之喜而起效先生立日譜以自修省先生喜之爲立日譜條例 臯間寄書至先生揖而問讀曰南旋以存學示人雖極倔强者亦首肯知斯道之易明也 批長人日譜曰此卽誠意之功也立日譜者欲遷善改過以爲聖賢也果見善如好色好之必力改過如惡臭除之必決則誠矣又曰自顏先生王法乾王崑繩相繼舍我臯間南旋而予偃偃無師友之助矣今汝有志自修則吾道近在家庭聖經有事父幾諫

之道况以學相後先則交修益急凡見吾過汝卽進言勿以嚴而見憚也 三月浦公催如京因以告降就教尙可將母商之靈皇靈臯是之乃投改教呈遂回 四月抵家拜母副室以朔日生子名之曰十二官 稜海內友朋往來詩札爲友善帖曰交遊盡天下之選是天之成我也我不克卒成之不負天平

四月思治生之道四天無違時地無遺利人無匿力物無遁情治平亦以是矣 李軍廳柳高陽一惡人欲處之死其人持數百金求說情先生辭之已而劉士宜以百金包攬求說先生大詫曰子幼赤貧展炊不給官命說情人代說情送賄至俱却之豈有垂老而改節者乎嚴拒之 九月馮樞天來共質日記互規過先生規樞天貧而怨則志不卓樞天言人議先生力農致富先生曰非以求富也聊以自守也平生志欲行道今年已

暮知無用矣故遯迹田園胼手胝足則雄傑之餘勇也不祿
稽胡取屢困則風人之退守也人曰謀生致富曰求田問舍
而不答又所以自污而自全也非吾子誰與言此 南莊董姓
孀婦將改嫁其子號泣留之母不聽夜自縊索斷不死其母悔
中止而其兄與媒逼迫之先生聞之曰是當拯之急往南莊呼
董姬及其子問之果然其子言娶其母者今日將來勢不能止
求爲作主乃呼其鄉保正謂之曰人將守節欲盡孝而人逼嫁
之是誠何心汝往止之如不聽我必鳴之官以官法處之已而
保正來言事已止先生曰止之極好其爲此善事令其婦守節
子盡孝不亦美乎 金陵程啟生書來畧云聖道失傳莫甚於
朱陸以亂眞之僞似是之非互起而譁自習齋先生出乃舉先
聖立教之成法以示人幸得先生嗣其後得二千載已喪之眞

傳乘六百年將更之氣運伏願先生以道自尊而專肆力於周
官之三物旁求同志益廣其傳則先生之大有造於當時後世
者也 肅寧舉人朱蒼澍奉其縣令黃公命來請往會先生以
黃公君子也今世有此人而相失亦非所以廣布聖道也乃同
如肅寧會之論學論治俱相合臨別黃公惓惓然謀所以作聖
賢者先生贈之論學一則恕谷後集 楊公賓實任直省刑名
道自前月以書來候十二月先生如府聞其實有善政會之以
其政相質且問刑名先生語以恤刑之道欣然欲見諸行辭行
餽節儀八兩先生曰何爲者以贖則路近又無他故公曰明禮
作吏地方於同年故舊或高賢大良歲底必餽儀爲蠅炭資先
生曰堪耐貧久從不然臘惟以棉油從不燒炭惟以秫穰厚儀
無所用之公曰近者受教多矣豈同年老兄弟反不如古人新

交投縞贈紵乎且必却之是視爲不義之物也不得已受之謂之曰公以後無輕與也司馬公曰凡人必輕取而後能輕與公曰謹受教

戊戌六十歲

康熙五十七年

儀功如常每日存心使如帝天之臨 三弟婦卒因思學者心多畏遇災而恐懼修省不學者反是或恣逆或頑然 聞臯隴來京如京看之廿二日至拜錢聚庵問臯聞信言已來寓接待寺遂往拜之相見甚喜互質日記喜其乾乾惕厲 看方靈臯靈臯使其子道章拜從遊且使之相隨來莊教之乃以朔日同道章回作示言以示之一孝一勤學一立志作聖一習射御 看陶甄夫秦關稿序內有云顏李之學數十年來海內之士靡然從風豈南方信此道者已衆乎 看靈臯春秋通論言錫桓

公命歸成風舍贈王不稱天爲貶先生辨之曰憚臯聞有言或稱天王或稱王或稱天子皆據其來辭也其言考証甚核非貶王也孔子作春秋義在尊王乃以匹夫而褒貶天子是何義乎

四月註春秋 報選通州學正乃如府見楊賓實商之曰親老身病不往通州何如公曰規避不可居也若到任而病再商之乃領憑起行八月十二日到任使人接太師母 倉廩總督張儀封屢使人致意請相會不會恐有咎乃見之 諸生會文間語以聖道 同官約爲利事皆辭之 太師母到署供酒餚果菜皆善啖先生甚喜日必供四五次 會張儀封言陸王害道宜遵程朱然卽其言論之儀封曰專主靜良知之說朱有不入於禪者則主靜立人極周子倡之也又曰高梁溪立教凡來學必先使靜坐七日大是異端則靜坐者程朱俱爲之而以教

人也何一主而一奴也然儀封習痼已久恐不能出姑默
聞
學舉一鄉飲大賓其人則念佛茹素者也先生曰彼習異端何
以干大典且禮名鄉飲而彼不飲酒可乎已之 十一月病望
日不能行香十八日投告病文於州諸生來固留先生告以病
不得已 有求向總督請托者許餽八百金先生堅却之 閱
靈臯春秋通論度越前儒然此乃文義通耳至於春秋之所以
懼亂臣賊子者尙未及也乃卽其春秋非記禮之書春秋無特
起褒貶之文二說辨之與之書畧曰三代政事與禮相通故子
貢曰見其禮而知其政周之六官卽名曰周禮春秋改元卽位
朝聘會盟征伐卒葬何一非禮而曰非記禮之書似未確矣先
儒呆認褒貶二字遂刻舟求劍書月書日書名書字書人書族
處處點鏤而一往不合得高論洗之甚快然遂以爲並不起褒

貶之文則又不可孟子曰孔子作春秋而亂臣賊子懼聖人無
華袞之錫斧鉞之誅人何以懼所恃者褒貶耳今謂據事直書
而功罪自見則廿一史誰非據事直書者曰概因舊史之文則
舊史足勸懲矣孔子何以爲作且亦何必作也

己亥六十一歲

康熙五十八年

既以病告休一切學儀俱廢惟日夜存心以敬侍母食息惟謹
身稍安則訂舊著日譜時下一圈失言黑左失行黑右暴怒黑
上動慾黑下 宋生員惟孜以靈輿爲价來拜從遊 一石生

來見自言有志於宋儒之學又言今日惟恐異端亂道先生曰
何爲異端曰專主靜而不敬先生曰主靜立人極周子之教也
靜坐雪深尺餘程子之學也半日靜坐半日讀書朱子之功課
也然則主靜正宋儒學也石曰主靜須以敬先生曰此當有辨

六經無言主靜者吾儒主敬則自靜二氏主靜却無敬也石又
言朱子爲聖人先生曰何以見之曰集羣聖之大成先生曰劉
靜修言朱子集宋儒之大成今子又言集羣聖之大成漢唐儒
說朱子已不能集矣况羣聖乎夫孔子集大成者得志則二典
三謨文謨武烈皆親見於身非僅以刪詩書爲集大成也以讀
書著書爲儒者七百年來之大夢也 二月習中來通見南方
諸友書嘆今之學者其困於先儒者旣入迷途而出於先儒者
又樂爲異說則傳注之刻何可緩也 四月四先生將車至乃
送太師母歸家四先生習中隨 寧波鄭禹梅之子性前歲在
關中讀習齋年譜而是之數千里來拜問學餽潘平格求仁錄
攝篆人至乃以三十日行因思到通八十餘日一無可爲惟
自守不請謁不迎送而已若立文會人以爲功予以爲不能以

聖道誨人乃過也何功之有諸紳士以棧於黃蔬園先生作喜
歸詩曰潞河輾轉病顛非總禍虛名誤釣磯猶幸八旬三計日
布韋驅至布韋歸以上任至告病八十三日也 五月五日到
家拜母獻家祠 看求仁錄潘用微志在天地萬物一體其惻
世殷其任道勇力行人倫日用亦實較朱陸之自了似過之但
未明聖學置禮樂兵農不講則力行人倫日用亦祇自了而所
謂悲天憫人者何具以救之且斥朱陸心性近禪而遂謂心無
靜時持敬之功則戒慎不覩恐懼不聞不動而敬何以解之又
謂正心不可有功效在誠意明背大學亦不可訓 六月任若
來持畢聞自故城寄書至 先生責任若貪利作欺非習齋教
法已而任若衣冠來謝教先生喜其受規勸知改過尙能無愧
習齋也 復畢聞書畧曰來教云大學之道不宜註作路道之

爲路借語耳可云一陰一陽之爲路乎夫曰道之爲路借語耳
是以道爲正字路爲借字也不知道亦借字也路從足道從走
皆言人所共由之義理猶人所由之街衢也洪範曰無有作好
遵王之道無有作惡遵王之路道卽路路卽道非一正而一借
也陰陽往來正如由路春夏井泉涼地上煖謂之陰往陽來秋
冬井泉溫地上寒謂之陽往陰來天地以此運行非路而何故
易陰陽曰天道而荷天道卽曰荷天衢並非敢強辯飾說也且
中庸言行道論語言適道尙書言遵道皆與孟子言由道由路
同道卽路也遂亦可曰小人之道小人道悄若以道爲定名爲
專物則是老莊言道曰道生天地曰有物混成先天地生其視
道也非虛位而實異端之說矣宋人曰陰陽非道所以陰陽者
爲道則顯悖聖經陷入異邪道不訓路其失非小願門下之俯

審之也又曰傳註太文前承示及今又垂示夫古人未有教人
立言不文者孔子曰其言文左氏曰言之無文行之不遠若以
爲傳註卽不當文則孔子作彖傳彖之註也象傳彖辭之註也
繫辭傳易經之統註也爾雅亦註體也而何其文也埤傳註之
文實授於毛河右先生先生曰註經必宜潔古則理足而辭易
明斷不可如宋人禪語鄉談一概污穢拉雜故河右註經皆行
以古文法方靈臯遵宋儒者而閤愚傳註曰明潔簡快有物有
序因自嫌其春秋註不文欲重訂改孟子曰讀其書論說傳註
當令可讀宋人語錄無論朱子集註已有若干不可上口者豈
可效焉 教長人曰學求有用當人先求有用目盡明之用耳
盡聽之用心盡審之用以至言貌皆然若視聽言貌思塊然類
然不端不靈不大不遠雖日講經濟無所用之 思身已衰矣

行道無望矣廣布聖道傳之其人是余責也南方學者多有興起當往觀之乃以八月廿日同任若起行至安平晤趙偉業見其二子皆恂恂恭謹可謂一堂虞夏矣觀其所著服顏先生之學甚篤至喪強宿鄭宅晤王宗洙爲講論語入則孝數章已而諸生多來謁者皆以聖學誘接之至故城會臯聞以前所復書細質臯聞相合甚喜互質日記先生書臯聞日記後云詳問大記省察嚴克治勇所謂欲寡其過而未能也聖學在是矣然功力所在存心應事而已存心也或柴二氏之說屏事意念檢攝靈明一遇事率念引復覺昏勞且夢魂亦爲顛倒不如專從聖學無論有念無念有事無事皆乾乾惕若教以直內所謂修己以敬者心自有主身自不擾夢魂自爾清醒之爲得也應事也或有周旋世故人情之見則情欲既去自有懈怠不如聖言所

謂質直好義察言觀色慮以下人非以爲人卽以成己虛恭肆
應人自歸懷之爲得也愚聞亦書先生日記後云伏讀大記刻
刻念念以天下萬世爲懷鶴之不肖不以其頑魯而棄之諄諄
誘接如此鶴雖不敏請事斯語矣流連數日乃行至鄭家口晤
劉敬庵已而姬鶴亭請主其家鶴亭未老邁解永康之組可人
也主之敬庵問中庸朱註五行化生人物之說先生曰陰陽生
萬物易言也五行生人物則漢後之誤語也五行乃流行於世
爲人用者如蠶然木頑然金且賴人培植之銷冶之焉能生人
哉之武城晤劉天植張熙甫天植具門生刺投拜見其日記記
過纍纍不諱受之熙甫率其二子鉉鍾具門生刺投拜見其各
有日記年幼有志亦受之各評其日記教之以作聖自改過始
挺生求立爲學課程先生爲書一紙一日克己馬季常云卽約

身也每日習恭一二次挺身端坐心君欽明於內暇則爲之時檢點九容頭容直氣容肅立容德目容端色容莊口容止聲容靜手容恭足容重陸桴亭有言祇頭容一直四體自入規矩一禮儀每日太夫人前清晨請安一揖餘時供養不拘每朔望拜家祠拜母至接人待物各有禮焉因時因人處之可也一學功每日挽弓數次務如法看經一二板看史一二板看有用之書一二板如武備農政之類若務舉業則看時文一二首數日一習樂如彈琴吹簫之類御書隨便學之總之吾心刻刻不離仁義吾身刻刻力行子臣弟友吾學禮樂斯須不去身心自無奔放身自不廢弛事自少錯誤矣九月朔日先生望拜家祠望拜母挺生等拜先生辭行謂挺生曰學貴確乎不拔而又隨事處中則得之矣吾子勉之返至棗強張拙明李文長候問學先

生曰孔子學於識大識小論語言學詩學禮焉有後世以誦讀
爲學以講論性天爲學者二子有志脫去俗學乃可以知所從
事矣遂一路自安平歸里成一詩曰一鞭遊歷戒清途爲喜斯
文近不孤到處入門攻禮樂幾人搔首問黃虞清河釜水天光
遠安平有漿臺黃強有草色枯隆緒茫茫儼有待可能萬
里走駒駝 十二日五先生卒先生大慟至十月八日葬 恩

年老學習功難當益純於內地 臯聞次子敦夫具門生刺來
拜閱畢聞春秋附筆皆有持見修字達之稱其識見大進但其
詩說尊毛駁鄭難爲定論 習中院試入府學生往送學使學
使吳公曰尊翁禮樂兵農之學皆有家傳子其勉之 楊賓賓
陞貴州布政先生往餞之酌而祝曰一時功勳萬世德業願我
公自愛又酌而祝曰惠鮮南方無忘中國願我公政成速返拜

別而行

庚子六十二歲 康熙五十九年

儀功如常 黃肅寧來拜 浦公請爲鄉飲大賓先生以期服
辭不允十五日登筵浦公來懸扁於門曰當代儒宗 三月憚
臯聞書來以先生不是其詩說辯詞甚厲先生復之書曰來教
云某旣爲月三之訴望先生無爲子昆之怒閱之駭然懔卽愚
妄講學論道何處容一怒耶旣而思之先生於壻誼則金石情
同骨肉謙居教下謬推宗主於壻有何疑貳但以旣著一書須
知已稱是乃可心安故必欲取正愚謬觀又云恐先生又涉忽
畧未免過於直遂近於激切可以見其意矣愛教我以直感待
我之重敢汗顏爲先生再陳之壻也自反最爲譾鈍然持心立
身不敢但效子昆之剛直較急者生平知交雅重毛河右王崑

繩方靈臯河右所著間有破人駁者慨赫然立壘攻擊王崑繩
著平書堪喜而疾讀崑繩曰河右贊吾兄閱書灼如觀火又如
觀水寓目卽駛此乃讀書不細也吾著各則相網維牽一動百
一字不可更易何得易讀堪笑而謝曰謹受教靈臯註春秋仍
用其通論分詮之予曰通論爲後人解春秋前後不通者發求
盡孔子竊取之義也註須抉剔其義靈臯不以爲然曰除通論
無所爲義也三君子皆天下士也而不免盛氣護前者想其少
年原自辭章入歐陽子謂文詞難工而可喜易悅而自足故自
持一論遂有專固堪學力遠遜三賢矣然每念曰執德以宏又
曰寬以居之凡有所著必質於人若有道見教是卽改正最陋
護惜如雞羽自珍者卽所駁不合亦必再四推敲實見無當姑
爲敬置所以自反虛衷反似少過三賢何者蓋以得力於習齋

先生之教也當從習齋爲學時不以辭章專以躬行每會勸善
攻過摘露肺腑面赤髮植不以爲甚以此雷霆斧鉞受之熟矣
旁人見之以爲不近人情而與習齋直如頭目手足互相救援
並不敢言感何況怒也矧今進言於先生以效他山之石卽先
生不受而來違覆堪言非則引咎是或再商亦何由加以怒耶
先生千里共學同功一體較三君子諒更有進故妄陳以共勉
焉至以堪稱康成學行卓然聖經不亡實賴其力先生駁曰觀
傳載戒子書吾家舊貧不爲父母兄弟所容學行卓然者肯爲
此語乎七十之人尙以父兄爲憾醇儒如是乎聖經至東漢列
學宮已久卽無康成註亦未必亡何力之有若論其註則全據
緯術豈可稱醇適亂經耳卽如言禮以圖邱方澤宗廟爲三大
禘先生以爲是乎嗚呼過矣康成好學父兄欲其爲吏傳首云

少爲鄉衛夫得休歸嘗詣學宮父數怒之不能禁其書接不容
下云去廝役之吏遊學周秦之都是也言此以戒其子使向學
耳先生遽曰憾其父兄則甚矣傳載少通易春秋歷算又受禮
詩書博縱六藝時之俊傑百家並起莫不嘆服則長於學問劉
昭烈曰吾幼周旋於鄭康成盧元直言治道多矣未嘗及赦則
長於經濟與孫嵩趙岐同被禁錮則長於氣節其子益恩赦孔
融之難捐軀報德孫小同不附司馬氏則世傳忠孝袁隗陶謙
袁紹等敬禮崇隆而皆不能緝黃巾賊數萬見皆拜相約不入
其境則無貴無賤皆心悅誠服尙不得謂之舉行卓然乎傳又
曰中興之後賈逵范升之徒爭論古今學康成義據宏深古學
遂明又曰東京學者互相詭激遂令經有數家家有數說康成
括囊大典刪蕪刊漏學者乃知所歸先生曰康成何力且亂經

豈當時之言盡不足信乎其染纖緯間有之何云註經全據總
術也稱三禘自是其誤然不可以一節之短一語之錯而遂詬
其生平也堪於宋儒每有駁正爲其特立一學術至使人心陷
溺世道衰微卽如我輩不爲宋儒所病矣而尙有迂濶尙淪懦
弱尙染浮文尙時動釋老之心道不盡明不盡行皆少飲宋儒
毒致之也則爲所病者更何如故不得已辯之然止論其學術
不牽其品行謂得失各有在無苛也且其失亦隱而不發者多
矣非爲先儒存厚乃爲我輩立德也請共勉之至承諭不蒙詳
察亦有故當白昔歐陽修不喜文中子韓魏公在政府從不言
及中論每服膺之以爲大臣休休之度如此世固有不喜文中
子者矣亦有不喜孟子者矣渠見已定急難拔而其人則賢人
君子也吾必與之辯覲面分途何益姑置不論而其理國政共

爲善事有何不可卽如先生見教大學之道不宜訓路會一批
於鄙著又一見於來書瑣皆未答非漫不察也以爲此所關者
小吾但論其大而小自明朋友相與必毛分縷析處處爭辯恐
傷和害大及後三論四論責以愼諫然後不得已詳復之又面
質之而先生亦勇於降心以爲合矣如此未答者不一而足願
無概以爲不察而罪之也今旣承教詳察不敢自廢用竭衰鈍
將來札捧讀五六過又將傳序閱五六過反覆沉吟條答如後
錯按前修譜者此書皆不錄然此正足見先生交友之道所謂
忠告而善道之也朱子象山辯論太極幾於立壘相攻視此何
如也錯重修譜乃備入之此後條答數千言茲不具載 馮樞
天閱周易傳注完曰足見先生行止通身是易矣 衡水劉廷
直具門人帖投拜先生見其聰明受之 思聖賢之心純一兢

業故中庸曰戒慎恐懼曰慎獨曰齋明論語曰立則見其忝於
前在輿則見其倚於衡易曰洗心退藏於密孟子曰操則存書
曰欽明二氏則但有虛明而欽齋慎懼之功無之也故二氏心
空儒者心實二氏心死儒者心活二氏之心真如儒者之心齊
樸燕越分途不可混也 習仁作學記欲屏宋儒之學從事三
物習中作士論希古道先生喜之 思宋人主敬卽主靜故曰
主一無適若以小心翼翼爲敬則與主靜判若黑白矣姚江固
聚斲之士也旣見朱子之支離何難直追孔孟乃又別出一途
以亂聖道則氣運之未返也今天心宜悔禍矣 謂二子曰學
者存心惟宜欽敬不可先求自得蓋自得坦蕩乃莖業之效驗
又曰孔顏之樂卽是樂道樂學故曰好不如樂故曰發憤忘食
樂以忘憂若宋人曰知有道而樂之則粗是禪語矣 齊燧侯

自西邊來言十四王使人訪先生先生慄然畏聲問之過情
六月陝西武舉楊蘭生來山蔡瑞寶書言十四王聘先生車馬
在後使渠先來問訊先生答以老病不能行復瑞寶以字託爲
代陳車馬之來務求中止楊慎修魯聖居張潛夫皆有來書先
生各復以字各有規勉 冀州劉煒持其兄鑾輝字來問學先
生答之曰持身莫如敬應事貴於敏成材務學有用寡過先去
自便 思聖人心體毫不異人祇時時如常人之見大賓承大
祭耳若二氏息念以爲心性則與常人異矣 臯聞書至論詩
凱風豳風皆從先生說詆康成亦爵過自責 思中庸誠字朱
人對私僞說一以樂於二氏以無欲爲主一者身分低覺人欲
難消故云不知誠卽孟子之充實有光輝也故曰致曲有誠故
曰萬善皆備於我矣返身而誠其用功則尊德性道問學致廣

大盡精微極高明道中庸溫故知新敦厚以崇禮至德凝道則
肫肫淵淵浩浩矣是謂誠矣豈但去私無僞而已哉 九月哭

五先生釋服 十月朔如京謂靈臯曰小心翼翼如承大祭如

見大賓之謂敬主一無適主靜非主敬也致曲集義萬善充實
之謂誠眞實無妄質民之誠非吾儒之誠也宋儒解經之誤在
此其學術之誤亦在此先生尊宋儒者不力學爲聖賢則已如
欲力學爲聖賢此不可不辨也 時先生欲南還而靈臯爲戴

田有事入旗將北居因以其南方田宅贈先生先生卽以北方
田宅易之故先生將往江南相宅靈臯寄字與其姪付先生帶

回 十五日抵家 二十日率習仁暨一僕南行 二十二日

過衡水至劉邦司齋齋其日記有志且能與同窗友習禮嘉之

十一月初三日過鄆縣拜孟子廟 初九日過宿州曰此古

睢陽地也南障江淮張許之功大矣拜二忠祠 十七日渡江
持敬到江寧自勘一路待人以寬處事以慎無大過矣入儀鳳
門至方宅投盤鼠字靈臯姪傳恭不在其母百川夫人喚其甥
馮方智來設筵下榻 晤周崑來張曉天王符躬李正芳身在
修程啟生江樂庵翁止園周侶樵劉伊園張鐫門諸友 諸友
皆設筵相招 親身在修所造測量天地儀器 翁止園問律
呂先生曰樂惟審音不在計數今律猶古律止園問今律猶古
何以辨淫雅曰以辭之邪正腔之貞靡分而律無二也五音卽
喉嚨舌齒唇貞婦莊語淫女媚聲無兩樣喉嚨舌齒唇則今樂
古樂聲卽懸殊而無兩樣宮商角徵羽可明矣 觀李正芳所
著正芳求爲作題辭乃爲作題曰予到金陵李子師柏持其所
著來質斥呂晚村舉業可爲伊傳之說而以顏先生六藝之學

爲宗且躬親習之可謂褻然特出之士矣或曰道本也藝末也如舍本而趨末何予曰是何言也論聖道不準聖經乎孔子曰執射執御是以射御爲學也子游以弦歌爲學道是以禮樂爲道也孔門身通六藝者七十二人而有德行有不進仁是德仁皆在六藝內也以倫常日用言曰道得倫常於身心曰德心純粹曰仁而所以盡倫常之實事者則曰藝今以藝爲末務記曰禮樂不斯須去身夫末務而何庸斯須不去乎魯論曰立禮成樂文以禮樂可謂成人末務而何以成德成人也乎母乃聖言誤與 初六日往高淳看田因至寧國靈輿言寧國亦可居故往觀之寧國太守黃瑞圃具帖來請乃往拜之太守力請入署下榻延登古北樓十八日辭行太守力留先生曰今歲返省則正初可行老母倚門倚閭之望不能耐也太守曰吾同鄉年誼

不此度歲而回方宅人將謂我何乃留 劉允恭持門生帖來
視允恭舊日門生此時從梅定九學數也言定九欲來拜八十
八歲不能行請先生往一晤不然此生不得見矣明日乃同允
恭往會定九定九稱格物之解極是將別定九凄然留曰吾以
先生爲轉氣運之人故使子弟羣瞻且有許事相商恐老不能
再見矣先生曰公孫官翰林於京可以往來質學也乃辭返署

辛丑六十三歲

康熙六十年

儀功如常自念衰老須敬以直內令此心常存習演道藝令其
有用寬和接人令道有傳 初四日辭行初九日至方宅 遍
拜諸友 聞崑來言籲門守喪辭婚事臬司有女託崑來擇壻
崑來以語籲門籲門以喪峻辭先生作序贈之謂其喪不奪於
人則仁遇財色能斷則義確不可拔則勇勉之任道以希聖希

賢啟生作跋曰鰲門於同儕素稱謹愿然雅有大志時人未之許也恕谷先生來金陵請業問道者無虛日而鰲門與焉夫先生之學追聖軼賢其論道之始卒非好學深思者或窺於舊說而疑之鰲門獨以年少往來寓室從遊靡倦必其好之篤而信之專也嗚呼此可以觀鰲門之志矣先生以成就後學爲己任尤樂得人之善而道之鰲門辭婚一節洵人所難能而得之年少爲先生取誠不虛讀此序許以大節期以進道惓惓然信乎大賢之用心也因樂聞而系語於其後 十六日詩友皆來話別十七日雞鳴卽行諸友來送者皆不及惆悵而返 一路衝泥冒雪皆畏人先而先生尾之 一路見東省北省人之橫詐不如江南人之和平恐禍之未艾也 二月初十日抵莊拜家祠太師母在鄉卽入鄉拜母知三先生續弦成習中爲之辦銀

八兩麥二袋喜之 知十四王又差潘楊二人來聘不遇而去
先生自南歸皆在鄉侍養以三先生新婚請太師母來莊不
允也 六月接太師母來莊閏六月太師母病喚弟姪皆來莊
侍疾 七月靈畢書來言其副室南旋喚長人夫婦作伴同行
最便 先生乃同兄弟朋友議皆曰侍疾左右孝之小全綿先
嗣孝之大且子孫滿前供養遣一孫出不爲缺人稟太師母亦
許之乃遣長人夫婦帶一僕一戚南行 二十六日太師母去
世先生慟絕扶甦 八月十六日僕回言長人船上大病方宅
隨後又使人來言長人卒於泊頭數日柩至先生哭曰天意不
使南也已矣 九月作顯妣馬太君行述又作長子習仁行狀
靈畢寄長人哀詞至有曰長人承親事師交友毫髮皆在於
禮而行之甚安 十月葬太師母本縣浦令肅寧黃令皆來弔

莫 聞學院陳世倌博學教官傳二縣士子公舉顏先生入
文廟鄉賢祠

壬寅六十四歲

康熙六十一年

思喪敬爲上然庸怯之姿言敬已不敬矣其懼乎易曰懼以終始其要無咎日三復之 與三弟札云昨接靈臯爲習仁哀詞末云易哀爲憂而終之以懼惕然感動易曰懼以終始其要無咎又云內外使知懼中庸不但言戒慎不覩又言恐懼不聞孔子曰臨事而懼因念夙昔持敬不如常懼蓋敬猶平持之也恐不敬亦以爲敬矣懼則見已過真懼則過不敢不改懼則言行自檢校三弟高明亦近今所罕然性與懼遠以氣質偏伉而又誤以遭禍不懼爲英雄也自茲須常存懼心如鬼呵神怒以滌夙愆論語又曰君子不憂不懼勇者不懼然君子不懼孔子有明訓矣內省不疚何懼我輩內省果不疚乎而敢言也 思五倫皆有朋友之意乃佳君臣如朋友則堂陛洽父子如朋友則

庭幃親兄弟如朋友則翕合夫婦如朋友則敬別 自省持家
嚴急嗃嗃然一過也須寬以居之人有過短不忘於心一過也
須見人一善而忘其百非 大名府知府吳允謨遣役持聘儀
來請往講學先生以居憂辭不往 唐翰林建中倩任若求先
生所著與之 五月以母不在時思兄弟皆呼之來莊 七月
二十七日行小祥祭 九月有人投刺曰北臺山人李銓拜已
而輿馬衆至入晤則李穆菴也相與論學看大學辨業深以格
物之解爲是別後寄詩來稱幸晤 自書座右云薄責人厚治
躬所求乎弟所求乎子惟在反身克己初非難終不易勿曰子
知勿曰子行更須結果收成 十二月大名張珂具門生刺來
拜問學請學禮教之同習中習士相見禮習射易其字非玉曰
可玉

癸卯六十五歲 雍正元年

可玉求立爲學課程爲之立課云一朔望習禮三日習琴六日
習射八日習書十日習數一每日檢威儀言語得失一隨時體
察世故人情一每日閱論語幾板易幾板一每日臨臥及早寤
必澄心持敬 爲長人立嗣以其同高祖之侄名之曰敬承
命十二官敬承上學可玉教之 七月二十七日行大祥祭

九月朔日行禪祭禮 白任若至持贊問學書並讀四存編詩
云茫茫墜緒幾千秋大道而今得所由漫向浮文爭巧技好從
實際問良謀杏壇德行推顏閔洙水達材在賜求不有博陵翁
覺者詞章應供一生休讀大學辨業平書訂詩曰遙瞻北斗
冠裳賴有靈吾大道光正德厚生追二帝兵農禮樂溯三王學
功振起千秋類治術宏開萬世昌何日鼓南容北面一時頓解

九迴腸先是壬寅歲底張介石先生同白任若飲張九錫齋酒
半解衣脫幘任若出先生辨業學規張先生讀序畢急正冠盤
襟北面再拜曰此聖學也吾門下劉調贊可讀此間二日卽寄
贊贊以遍除未及覽是歲新正乃披讀再四如夢初醒不覺驚
喜欲狂夏又得四存編顏先生年譜及先生諸著伏日讀之常
數夜不能寐每吹燈強臥忽思古之爲學何實而有用今之爲
學何虛而無用與不覺憤然危坐復思與顏李二先生幸生同
時地之相去又不甚遠苟不擔簦請業負此生矣忽躍然離床
獨立如此終夜不知其幾因賦前二詩遙寄先生以矢願學之
誠先生覽贊詩復問賤齒二十四歲拍案叫奇遂答詩曰居憂
未畢言無文覽子鴻篇不自禁天地依然成上下孔周豈遂竟
浮沈雄才欲負千秋業高足應登萬仞岑每度長宵悲墜緒從

今收泪付球琳贊自憾德未能進業未能修今修譜至此愧勵

交加矣馬師母不順先生責之不伏謂四先生曰彼不順禮

宜出但無所歸食之至死耳十月朔祭家祠太師母主始祀

祠長人主祭畢猶歸殯宮以待禪後祀也劉調贊林啟心來

以晚生帖拜先生次日任若來乃价之投門生刺先生率之行

釋菜禮上以孔子位旁設顏先生位告之贊同啟心從先生

學士相見禮祭禮彈琴挽弓演數分日習之各立日記省功過

贊同啟心維周敬承夜讀琴聲聞之先生甚喜維周亦立

日記爲學作序自艾自力先生喜之十一月先生教贊以習

學幼儀爲主以辨學術爲急武備亦宜知之不必先又曰慎幽

獨謹細微習勤儉語贊曰執事專一而又能肆應乃可以言

經濟矣攜贊如安平平可謂言晤弓御九王博古語以智深

勇沈弓遜甫邀至其家其父出會甚恭過深澤晤王濟光王槐
三至無極弔張肆六妻喪爲作墓誌銘返里語贊曰此行如弓
遜甫父子之勤王濟光之儉可希哲之模張肆六之幹濟王槐
三兄弟之文墨皆有可取焉 十二月朔贊入京晤方靈阜靈
舉言人有毀先生者先生曰此他山之石也又言

朝廷謀聘學行兼優者教 皇子中堂徐蝶園冢宰張桐城擬徵
先生已而又謀聘人修明史二公亦擬徵先生俱予力陳先生
老病不能出而止先生謝之贊按宰相謀徵先生而靈舉以老
病阻之時先生年六十五未嘗老病也或曰靈舉與先生至厚
知先生必不出也然先生一生志在行道非石隱之流也觀先
生祭顧先生文曰使璿幸則得時而駕舉正學於中天挽斯世
於虞夏卽不得志亦必周流汲引使人材蔚起聖道不磨此先

生之志也竊觀靈臯與先生交至厚而學術不相合每相與辯
學先生侃侃正論靈臯無能置詞則託遁詞以免暨先生歿爲
先生作墓誌於先生道德學業一無序及僅繼陳其與先生及
崑繩先生相交始末巧論譎譎曰以剛主之篤信師傅問余一
言而翻然改其意固欲沒先生之學以自見者此豈能有朋友
相關之意乎夫以抱經世之志如先生負經世之學如先生几
我同人孰不望其一出者張徐二相國謀徵先生此千載一時
也乃靈臯一言止之先生亦遂終老林下矣行或使之止或尼
之非古今同慨與 聞王太倉尙在京往看之太倉老而諄切
固留明日再一晤因言其獻歲八十求一言以垂不朽先生許
之觀其請建儲五摺乃太倉大節也 爲贊買琴劍而返一路
隨事教之曰再目加明耳加聰心加靈則進矣 臘底新令喬

公以教弟帖來拜餽稻米一石炭百斤下問殷殷畧舉蠶事告之

甲辰六十六歲

雍正二年

儀功如常每月下書懼以終始 語劉穎生曰吾有大過一知人有妨於仁也須急改之 批習中日記摘小心二字教之訂易見天下萬象森然在目知明則處可當矣夫子所以云可無大過也 四月尹元甫問曰達者質直好義下人已矣察言觀色何爲者先生曰後儒惟不解此句所以流於腐也經云視於無形聽於無聲是事親須察言觀色也色聽詞聽是臨民須察言觀色也明德親民皆不可以無此 作壽太倉詩二十韻有佐斗心如日擎天鬢已霜之句正謂其請建國本也 與方靈臯書曰聚晤得領諱言洗垢指癢若沈疴之去體朋友相成

其樂何如。搆素交天下賢豪，但求其長以補己短。至友人長短，不敢輕言。一以己學未至，不遑治人；一以其人氣方盛，而驟語之，恐損夙好，無由取益。今以先生之切偲而知愚之抱罪，友朋多矣。故於先生亦願少有進竊。念先生與王崑繩少年皆從事才子，文人非從事聖賢之道，大學小學以次而入者，故其氣盛，其情浮。崑繩識見文章卓有可傳，而偶有缺遺，或告語之輒譴湧而辯。而先生亦有之。卽如春秋周禮二著，尙有當參酌者，而不敢盡言也。春秋成風，敬嬴當稱夫人，小君一節，明反孔子經文明背左氏之傳，明與歷代帝王國制出於天理人情之自然者相違。而先生必依胡傳舊偶言及先生盛辭，今呈拙著學禮生母附廟一則，乞先生細考之。若以爲是，足見先生轉環之勇。若終以爲非，乞將拙著一一批駁示下，則搆無益於先生而先

生有益於臻多矣 五月間瘟疫流行處處傷人年餘不止悚然 讀易嘆文周以上古聖人而其文似從萬世後閱歷一周者真神聖也且四聖皆同筆妙同透悉世故人情同含天蓋地真不朽之物也 有放月錢者求習中出名分利習中不應先生嘉之 習中問時有欲心如何先生曰遏欲莫如存理心多一分天理則少一分人欲至於天理爛熟則人欲不作矣 習中送日記求批勉以勤儉仁讓 有遭母喪借糧者先生曰不必借也助之四斗 六月河水大漲波潰北岸莊不可保鄉人請祭河神先生往祭爲文祝之次日視河湧波南移北岸落淤先生曰東坡言神可感而人難感其信然耶 任若回南先生通寄諸友一詩曰南方諸友近如何瘴雨瘟風此歲多五夜捫心頻自問可能有道起天和 自勘本才短德瘳不幸當空乏

之時遂以渺身寄天下萬世之重其悚懼宜何如也 十二月
使人聘鍾金若來教子孫

乙巳六十七歲 雍正三年

能功如常惟衰老益劑以中和表章聖道急待其人 正月請
金若至使子孫從學金若亦侍其子淑來使從學於先生 劉
士宜卒家貧糾衆助之葬 二月調贊同任若來因率之同往
博野祭顏習齋先生劉古衡卽介任若於習齋前投門生刺拜
先生 教調贊以擔荷聖道贊自慙庸陋不克如先生願敢不
奮勉乎 贊請學易先生日爲講一卦專以孔子之言解文周
何其醒切乃朱子曰義有義易文有文易孔有孔易誠夢語哉
教諸生習刀法 教贊以筮法 贊與諸生習祭禮先生教
之 贊謀歸金若置酒餞從先生登舟飲先生云順流共飲整

卷之三
明月贊云登岸高歌瀚惠風臨行贊祝先生以保養精神專以
承先啟後爲孽孽接引後學再加溫恭和平先生曰子見吾接
子有厲容乎正吾之苦衷也去歲子約來日夜引領而竟寂如
是以始而思繼而望終而絕望故於子之來內苦而外厲也今
見子終可與言望以其肩聖道也而敢厲乎言畢凄然贊亦悚
然拜別 王宗洙讀先生平書訂談經濟陳學使以聞於

副授成都令或曰此亦吾道將行之機先生曰正恐其經濟才短
以致債耳且其來字云聞教於我者頗詳而不知吾之語之未
詳也乃贈之以序曰旋乾而轉坤以其時也權安而小濟亦有
道焉說遇而獲禽未必如王良之巧也恐爲人所詒而徒然也
三月評金若日記夙興夜寐省察甚嚴顏先生門下一人也金
若子淑新立日記有志於學乃率之釋奠先聖 謂子能曰子

身不直聞吾言卽直日記不成句今成句時文無章法今有章
法凡事如此進益聖賢非異人任也子能鍾淑字也 四月如
府會顏廣文仲子紹裔癸巳舉人楊賓實門人也言賓實夫人
嗜甜果紹裔多購餽之賓實頻感曰此中人以所欲也他日登
仕此事可長乎先生曰楊賓實今世道學第一人也吾子不以
爲貴已而識之亦君子矣 語金若曰平書若行一縣有百餘
儒官有萬餘練兵家皆有食士皆有用游惰去異端靖其庶乎
惲聖問書至自言問道晚而躬行淺境遇多艱惟平旦凜凜
自持庶不負先生之教耳又言南方聞顏李之學而興起者有
是仲明章見心許聞繡孫子房 六月作憂旱詩曰老年炎暑
不堪親晝掩閒齋自息神威舊如懷前世事守先猶作後亡人
天高碧漢繁朝宿水落河橋走暮塵燕趙悲歌愁入耳金遼征

戰幾遺民 思人好言經濟名理者君子也好問言者庸人也
好言人短及伺人陰詆人富貴聲名者小人也 聖裔孔衍注
以舊來候先生並送其家刻三本 思庸人無事恬放有事張
皇君子無事悚惕有事舒寧 八月解春秋春王正月聖筆也
蓋春正月史文也王則夫子之筆也王正月者周正建子之月見
周惟正朔行於天下有王也他如禮樂征伐皆無王也 金若
以潯辭館歸留其子淑在此學先生卽命少子習禮孫敬承從
淑讀 思顏先生以天下萬世爲己任卒而寄之我我未見可
寄者不得不寄之書著書豈得已哉 溫太守舊來言政暇卽
使人來迓 語子能曰聖門言道在人情中庸五達道是也在
四德易立人之道仁義是也在禮樂論語君子學道是也在威
儀言詞君子所貴乎道者三是也總一道也庸德庸言也上之

爲性道道之原也聖人罕言之再上之爲天道非人事也愈罕言之若常言之則流於空虛矣以空虛爲道則異端矣 十月入府會太守溫公時公已奉

命賑飢民因問此時賑矣春何以救之先生陳言勸富民捐粟查歷年各鄉積穀勸興作招米商禁遏糴禁酒禁賭禁盜 始註

春秋 十一月如京拜陳子翹以其將查北直水害且開水利爲桑梓計宜有所言也 看方靈臯靈臯言將爲先生作釋言

先生曰他山之石良藥也焉用釋 河南主事李汝懋請筵論

學深以先生學爲是尤服膺後集言侯朝宗文涉靡擬汪荅文

潔而弱方靈臯練或傷氣皆不及先生文也 陳子翹書至言

同大學士朱可亭查水利可亭言神交先生者已二十年特使

問水害水利先生答書言一開直沽海口一濬永定河一挑淀

於一修趙北口洩水橋一分猪龍河至興水利則有西北治田
說諸書可稽也 作麗魏氏傳氏貧而守節孝事祖姑與姑年
饑義不受賑作傳爲之感慨流連

丙午六十八歲 雍正四年

常儀雖老不敢不勉常功雖不能親學而禮樂射御書數教卽
學也心期和平身期莊肅昌明聖道不敢旁委 正月註春秋
覺經詳而傳畧 教子能以謹小務曰小務有用乃可圖大
思黃蕭寧之謙謹可師麗魏氏之見利分明可法 謂子能曰
宋人解經卽有誤處乃學術之偏非強不知以爲知也惟易經
則程朱俱屬強解春秋胡傳則如南粵人說中原並未北行一
步刺刺鄉談自言自語殊可異也 間路多蹇者爲之畏天命
憫人窮 日有來求者或與以粟或與以餅或食以飯思年荒

入亂天迫當益存其心 三月註春秋前後斷續離合若見其
人若閱其世若親議其善惡治亂興衰之故而與之往復流連
者註之乃覺迎刃而解 四月安徽巡撫魏君弼書來並托王
仲英求先生至其署不往 八月樞天至評其日記喜其用力
有不忘溝壑之志 註春秋至陽虎謀誅季氏出奔聖人全削
之但書盜竊寶玉大弓得寶玉大弓誠神筆也至文也大義也
註春秋完作春秋傳注序曰塔幼讀詩書三禮雖儒解錯互
而雅言日用可以心證惟易與春秋難之後以孔子筆傳詮文
周辭十釋入九顧春秋以爲不可解舊傳云孔子筆則筆削則
削游夏不能贊一辭是游夏之賢尙不知也而況三傳乎故左
氏但記事而不能疏義公羊穀梁疏其義輒誤而況後儒之望
風追影者乎泥於一字褒貶遂於月日名氏人師等分例樹標

而校之全經一往不合矯之者謂詳畧異同俱仍舊史文而褒貶自寓則但錄史文足矣孔子何以曰作且廿一史歷代鑑誰謂非書其事而褒貶見也乃至垂暮而忽有所覲曰聖經不備在乎如傳載楚子使屈完如師師退而經更曰來盟于師奪楚與齊傳載南蒯以費叛趙穆涉賓以邯鄲叛經俱削之載范中行伐趙鞅鞅奔晉陽經改筆曰鞅叛則聖人之筆削史文多矣卽仍而用之有義在卽筆削也于是觀其事而成敗升降治亂瞭然如齊桓定伯數十事爲一事卽至定公夾谷之會許以三百乘從齊以齊曾爲天子之伯則仍齊桓事也而晉伯之歷久不待言矣觀其文而粲然或一字爲文或一句爲文或數十句數十節相比相屬爲文而文之或因或革乎史者錯綜變化鑠鑠憂然觀其義而子奪褒貶昭然義卽王迹也周禮也天子之

事也所謂丘竊取者也而邵康節謂春秋孔子之刑書亦明矣
禮樂征伐自天子出春秋以前事也非春秋也春秋則自諸侯
出自大夫出陪臣執國命皆貶也故孟子曰春秋無義戰例之
無義朝聘無義會盟皆貶也而彼善於此則褒矣顏習齋先生
謂孔子經濟之書亦明矣義見則天子之迹見改元卽位朝聘
會盟侵伐放殺昏覲享唁喪葬祭祀蒐狩興作甲兵賦稅封建
縣邑利弊隆替釐然可考孔子爲東周之具具矣卽萬世致太
平之法亦有前車矣子曰見之行事深切著明者此也因僭爲
傳注以質天下後世焉 思晚年每日心覺志氣如神身覺莊
敬日強庶不衰弛 九月與樞天論學在嚴取與 十月作一
詩以寫近况曰憤樂相尋忘老至教學互長念朋來流連三古
經成癖悵望千秋意未灰 爲子能講忠恕堂記曰不忠恕始

於適己自便終於忍心害理 謂維周曰聖賢天與人歸而稟
若無以自存庸愚衆喤羣怨而亢謂莫我誰何 王震聲督學
浙江使王仲英來聘先生看文有人而以先生總裁之先生辭
固求旣而送聘金六十兩至辭不受強置之去乃使維周持銀
送還仲英與以字言決不能往之故

丁未六十九歲

雍正五年

常儀如故常功量老力所任爲之勤家政接後學明行聖道益
孳孳不倦心益戒懼氣益和平量益寬大行益仁厚自勉 二
月樞天來互質日記樞天日記有云李恕谷包羅一世才毛西
河貫串五車書爲之愧歉勉樞天力任聖道以副遠望 同樞
天率二子一孫習禮三度 看刀蒙吉潛室劄記言盡性由於
踐形識見遠出宋儒且敬慎收斂省躬收過之言不絕於筆亦

近今之篤行君子矣 三月南方諸友周崑來李師柏程啟生
各有書來外有白門劉嶼洲山書言大道黜闇於宋莫有正之
者今得先生日月在手正五百年運會之期也所謂日月出而
燭火將息者也不知何許人自言伏處近並却書古文詞惟留
心實學奇之 四月靈臯字來邀入京先生念老矣天下良友
惟臯聞靈臯舉間之會不可必矣靈臯尙近向者論學尙未盡
言若及今而不一剖恐留畢生之憾乃入京晤之語之曰庶子
爲君尊母爲夫人春秋有經文禮記有典禮歷代帝王有成規
請先生勿執胡傳之謬也靈臯曰先生舉儀禮則喪服傳慈母
生母與父及嫡母同三年足可伸追稱小君之說矣不必用春
秋文也先生以其猶護春秋謬傳而但以追尊夫人小君爲是
姑已其言又謂之曰顏先生學之切實君所素許也但謂宋

是聖學則天下無是非並立之理請問其以主靜爲主敬之功
是禪宗否其存誠是愚誠否其窮理是俗士之誦讀否以六藝
爲末務粗迹而專講性天背聖學否以致聰明人盡歸無用遂
使神州陸沈王夷甫輩安謝其咎仁人念之垂泣否靈臯慨然
曰願先生急著治平書以爲世法則正學與彼學退矣錯按靈
臯之言遁辭也 靈臯閱恕谷後集曰兵隨敵變水因地流而
貌各成機杼互換必傳之書也 靈臯出所著釋言剛主曰人
心不可謂子安以辯爲哉韓子云動而得謗名亦隨之謗而無
名者衆人也名而無謗者鄉愿也雖然美疵不如惡石謗言彰
吾知懼矣名則諸君子之過爾因併識前語作釋言 歸訂樞
天喪禮就直 著擬太平策 十月先生自省書曰子六十九
歲之莫矣行道無望矣著述明道目力已竭矣惟是身心性理

可質帝天。口自返多有匱闕及今不力萬一抱憾而卒欲補何
由戰兢惕息。列後日省之一顏先生每責我細行不矜如出門
卽旋對妻。奴僕不莊肅其爲敗德多矣戒之戒之一性敏似
覺微長而性急實其大短每鄉人出語不合輒峻拒室人有過
嗃詈時有耄年不能和敬之一端也力改之一樊遲憂智之妨
仁深有體會予妄恃知人然知之不覺有冷心此非智之過乃
吾萬物一體之仁未純至也不仁則根本驟矣尙附名教耶勉
之勉之贊按先生德成學至猶痛自刻責耄年不倦如此吾輩
初學可少自寬與錯按論語言舉錯知以成仁先生慮智之妨
仁何也蓋論語所言治天下國家之道也先生所慮居鄉黨之
道也鄉黨間非族戚友朋則鄉鄰也拒之不可遠之不能惟有
感化之包容之而已先生以有冷心自斟是卽其萬物一體之

仁肫肫乎有不容自己者乎 聞子能入泮 十二月思書分
凶人吉人堯允恭克讓文王徽柔懿恭孔子溫良恭儉讓吉人
也霍子孟如芒刺着人關雲長護前君子而凶者也小人之凶
又何待言 黎長舉自河西走四十餘里來謁先生曰年已五
十再不從先生學恐虛度一生矣乃擇日行釋菜禮拜先生入
學先生爲釋菜文曰自孔夫子後而唐虞之六府三事三代之
四術三物杏壇之四教半存半亡於天下幾三千年矣習齋先
生崛起而表章之直傳周孔埤屢弱無能爲役而粗解其顛末
於是推明顏先生學以告當世海內之有學問者或信或疑亦
率竊竊然謂今世有顏李之學遠宗周孔也者卽來執經下問
者亦不乏其人然求其疑於心行於身實可經濟於天下者鮮
見豈無德之躬不足以振起之耶忽忽焉憐亦遂六十有九矣

德化有黎生宋淳者少遊秦習程朱陸王家言既而聞滕入秦
自鎮原來稱後學問道伊時甚期許之切劘其長短及別去幾
二十年不知其所在乃淳則日夜不忘欲來相從而淳能文筆
嫻刑名錢穀在位者爭致幕下屢爲人牽不得前今歲奮然決
曰吾行年已五十再不從師以定我學不虛生一世乎於是呼
從覓騎自河西拆秦晉北邊行四千餘里度四十五日辭紛華
之官場入寂寞之鄉鄙陋之野長跼稱弟子求嚴立作聖課程
以矢有成斯不亦奇尤也乎乃備酒漿菜餼行釋菜之禮惟求
我先聖先師真護玉之大成俾神聖持世之道從此不墜其所
關者不在一人一時已也 糾鄉人聘樞天明歲來設館教子
弟 長舉論西事須自肅州而布隆吉而哈密而巴里坤而土
魯番聯絡多設衛所以逼澤旺之穴又上計則撤兵守邊不必

疲中國以事無用也

戊申七十歲 雍正六年

一歲常儀功元日祀五祀家祠皆以牲體祀馬外祖行位以其
無後也拜孔子及顏先生清明七月十五十月朔祭家祠嘉平
二十四日祭竈皆齋戒小齋一日大齋二日戒一日齋戒飲酒
不至醉食肉不茹葷不弔喪不問疾不與妻妾同處不與穢惡
不刑人遷坐不會客惟齊心思所祭者朔望拜獻家祠五祀令
子孫分班應之獻訖行求禮每日晨起詣先聖先師禮樂射御
書數遇其事卽習之經濟有問者答之聖道經學有問者答之
致力以寬以和日譜日一圖或時下圈以黑白別心存亡失言
黑左失行黑石過怒黑上慾心黑下 接樞天至率習禮拜樞
天入學 辛博野會博野令趙公其署中葉孝廉惟一出見持

口記求詳則聞習齋之學而興起者也 看秦邊紀畧知涼甘肅必宜重守而玉門關宜復所以斷西北之往來也慨明之棄河套而守榆林不知東勝受降之既與嘉盛余子俊王瓊得罪社稷何如也 張額門書至言願表章顏先生之學望聖道之明行其素志也今帶銀二兩倩人抄先生諸著將刊行 易州李通率其子基來拜從遊 二月率長舉之楊村致祭習齋先生 惲鼎聞寄書至並孫應榴子房日記一本先生覽其日記自癸卯年三十歲間舉聞言服焉遂拜先生爲師立日記省過甚嚴且分日習六藝先生甚喜曰習齋之道南矣遙答拜之錯訂修年譜至此因於舊篋中檢其寄來日記閱之其自敘二十後習靜坐功與友人是仲明爲程朱之學見舉聞先生始知靜坐近禪示以恕谷後集大學辨業習齋年譜諸書始而疑後漸

服闋至感慨處不覺淚下卽擬北上拜謁因斧資不給乃北向遙拜先生爲師拜訖隨成一律曰恕谷傳人蘊樂先誰令斯道久云捐恰逢小子三旬歲遙拜先生萬古賢禮以純身卑法地樂須育德渾如天規模志定時時省桃李青春好着鞭於是立日記學先生之學焉旣而讀先生題王崑繩省身錄一則慨然曰數載景仰未得遂願見先生之志今以斯言自省庶幾如見也與乃逐句分註之日記訂爲自省之要自省心存密否密則日記書一直畫一否則書二斜畫又且以畫之大小別存否之久暫自省視聽言動中禮否中禮則書方口否則書馬眼○亦以大小別中否之輕重自省時覺有進否進則書一圈○否則書一黑子。亦以其大小別進否之分數禮樂諸藝每朔望兩考有加則書環○間斷則書缺○亦以大小別加捐之多寡天

理所悟人情所照經濟所閱歷或日新或仍舊夜寐而寤能一
一自省則晨起書一大紅圈○昏忘不省則書一十點子。每
月朔設案南窗下省一月之記某盤幾某畫幾記通之多少跪
而自訟其自治之嚴省過之密如此一日與其友論學某曰靜
坐甚得力子房曰靜坐非是自古聖賢惟一敬若有一欲靜之
念便是不敬矣且三省四勿敬恕皆在事上言一部四書未嘗
有一語教人靜坐也某友論先生以鄉三物爲格物之物非是
朱子解物卽事也何等渾融子房曰三物之六德統而言之
仁也卽天命之性也六行統而言之孝也卽率性之道也六
藝統而言之禮也卽修道之教也大學立教尙有當在此三
物外者乎某又言卽物窮理如侍疾則格藥餌出行則格行李
之類子房曰此隨時隨事之功豈十五入大學所格之物乎其

見道之確信道之篤又如此按舉聞先生癸丑來書曰子房本
世家子幼而孤苦刻志勵行聞顏李兩先生之學慨然悅慕信
於心習於身南方之士未有篤信好學如斯人者鄉居不時見
見輒以所學質必有進益去秋鶴自江西歸來會兩次既久不
見忽聞其無疾逝矣惜哉錯採其日記附錄於此庶弗使無傳
焉而又惜其日記僅四月餘者爲學數年其進德體道之功可
傳者必多矣而所見僅此也 三月葉惟一來拜贄以詩有句
云間氣鍾靈開智勇狂瀾降割善疏排 思老當益壯 思好
規人過亦屬氣量之淺朋友當勸善多於規過 思詩曰雖有
兄弟不如友生常人之處父母兄弟密不如妻親不如子投合
不如友朋熱中不如君非聖賢孰能孝友之盡乎 六月先生
之妻馬氏卒謂習中曰此子之出而不去者汝等不以母體解

之亦可從厚以母禮葬之亦可也 八月王順文來拜從遊教
以孝弟之道 語長舉以顧諟明命之功曰吾子留意於顧諟
明命可謂探本者然爲之有道每日夙興卽爲所當爲之事作
何事卽存心於何事接何人卽存心於何人事竣人去反顧此
心湛然在內一切聲色貨利毫不繫於懷旋而治事接人又如
之所謂終日乾乾也所謂執事敬也不可效宋人白日靜坐以
食二氏遺毒也若欲靜坐則向晦未臥雞鳴未起除省察前日
所爲得失今日所爲興除外被衣直坐收攝天君片時亦可然
主敬非主靜所謂夕惕若也總之皆顧諟天之明命也明命者
命吾之心也命吾心之仁義禮智也若馳思天地未朕兆之先
及天地氤氲生物之始以爲顧諟則誤矣前功旣熟則耳聰目
明心思睿智世故人情迎刃而解其效可以自考也馮樞天曰

存養之功自朱儒以來捉風捕影得先生教乃足踏實地直接
聖傳矣 十月朔致祭家祠畢因暈倒遂病類中風自此病三
月夜不寐著天道偶測一書

己酉七十一歲

雍正七年

擇病中所能爲者爲之 日記每月下書小心翼翼以終始
以自勉 調贊攜冀州趙本中來本中執贊先生辭贊代求先
生許之 白任若偕衡水杜謙牧來執贊學禮 二月武城劉
學山同王順文來學山問禮樂答之順文問經濟及韜鈴先生
曰韜鈴非老夫所知子少年文士去之逕庭非所問也卽經濟
亦無躁聖學先自治而後治人吾子有身且操存以養心非禮
勿視聽言動以檢身吾子有家須溫清定省以事親一體周諮
以友愛兄弟夙興夜寐一身一家之經濟果善焉而後講及人

可也請姑俟以觀 贊問律呂及歌法先生答之 贊同諸友
習禮先生觀之 四月修道傳祠成命贊作記曰祠因道傳取
諸韓子之言也韓子原道曰儒者仁義之道其文易詩書春秋
其法禮樂刑政其人四民其行五倫非異端老佛之道也堯以
是傳之舜禹湯文武周公孔孟孟子之後不得其傳焉今博野
顏習齋先生挺生二千年以下得不傳之緒重明舜禹之九功
周公之三物孔門之四教深考力行以詔斯人誠堯舜以來所
傳正路非世之依傍儒逕而篡入異端者也習齋沒恕谷先生
奉其遺命題其齋曰習齋學舍立習齋神位春秋仲月上辛率
同人致祭而講習其中歷廿餘年不廢但日久學舍漸圯其子
姓遭歲歲鬻其舍之前半四方同人至者不能容難以周旋駿
奔恕谷先生謀於所居東莊別建習齋祠堂從遊之士爭來伙

助不日磚木具坯聖積乃爲正堂三間中堂供習齋先生位而
左右將爲陳設禮樂諸器及顏李所著書版同門馮辰等公請
於先生曰左右堂不可但盛物也習齋除漳南梁魏一再遊論
學餘無及者其後推明衍繹廣布四方聞風而起者接踵實先
生功而先生又集六藝成法爲書辨居敬於主靜別存誠於質
民又傳註易詩春秋論語大學中庸孟子以習齋之說印證聖
經如合符節後學乃有所持循不入旁岐而益信習齋之學一
本聖經非臆創者王崑繩作習齋傳謂傳其學者李孝慈先生
之子一人誠非誣也辰等擬將先生遠道圖懸之東堂同人春
秋祭習齋先生訖同之東堂拜先生而瞻企焉不亦可乎先生
一辭又以公義請乃許之又請曰習齋之學一傳而得先生再
傳而得禪畢聞畢聞之北來也蓋棄其學而從先生學習齋之

學其別詩曰三年依溯得吾師聖道源流屢獲知千古有人遊
世幾半生從此定心期則其自任聞道也審矣南居日以顏李
之學告人今天下無慮口中津津顏李之學者王崑繩惲皋問
二先生之倡明居多如常州孫應和戊申寄其日記至遙拜先
生爲師記載省躬改過修德習藝之功甚密力肩聖道而曰聞
之皋聞則皋聞傳道之功偉矣於西堂立一生位而景仰之不
爲過也先生亦許之乃又議於習齋神位前傍設王崑繩先生
神位配享至於道中諸子可續入者事後論定則後人之責也
贊自癸卯得聞顏先生之道來從恕谷先生學不揣愚弱思承
餘緒以廣其傳而未能也今己酉夏祠堂告成因溯其原委而
爲之記 先生又自爲東堂記曰歲之己酉從遊諸子其鳩分
資築子東莊之東墅爲道傳祠正堂三間各間以序中間安顏

習齋先生神位西間立憚子舉間生位而以東間懸予遠道圖
令予坐臥其中予不能却也晨興輒扶杖緩步至習齋位前一
揖並揖崑繩排又門而坐弟子請業者以次應倦則闔門少息
咏歌先王之澤起則開窗遠望良苗盈畝茂樹連霄花香鳥語
爭奇獻好右眺郎峯蒼翠如壁左浴恒水風紋縠縠可愛雖手
痺足痠步履艱澁而頓忘沈疴之在體也方靈臯嘗謂我曰吾
每出城見墳園看守人持陳倉米飯飼偃蹇長林豐草間心竊
羨之使我得讀書其地一二年可以樂而忘歸而不能也然則
吾之貧羸陋況不敢陳於王公大人也而以之誇吾靈臯不亦
可乎 贊問律呂及歌法先生告之 贊同諸生習禮先生觀
之 六月訂擬太平策覺一生總結是此書 病減偶成詩曰
偃息匡床午睡餘起瞋痺足自如如賢愚不必榮懷抱勤惰何

妨任婢奴綴藻梁間乘日盡栽花砌側荷雲鋤殘年喜得沈痼
減或者天心尙起予 每夜必起坐以左足尙痛浮腫未除也

七月思樞天恩而固長舉愚而謬子能愚而欲求其不愚者
其劉用可乎道味深世緣淺則庶幾矣贊常自恨愚昧乃蒙先
生許以不愚愧矣哉道味深世緣淺敢不勉事斯語乎 馮樞

天來問疾言田生有志聖道先生曰善哉然而不易也志道須
滌俗念勿恥惡衣食須勉行孝弟忠信見利思義見害不避學
習詩書六藝斯亦今之拔出羣類者矣樞天曰喜其聞道能解
先生曰解易行難懋哉 九月上辛日以顏先生祠堂成先生
率門人致祭祭期不以二仲而以二季者以楊梓神主尙有族
人及博野門人守之不敢僣用其日也 十月營田觀察使黃
成憲贈先生獨善閉戶論謂孟子閉戶之言別有取爾孔孟之

心視天下皆同室學孔孟而鄉鄰天下則名教之罪人矣先生
曰若如公言則論語惟日用之則行孟子惟曰可仕則仕而舍
之則藏可止則止皆宜刊也乃作獨善閉戶論辨之 十一月
高陽張海旭爲其兄昆崖來求先生作左傳評林序已而持左
傳評林來求訂先生許之 十二月總督唐公執玉使布政王
公蕃以警幣來求先生作畿輔通志先生以老病辭 作孫節
婦傳

庚戌七十二歲

正月布政王公又以書幣价巨令喬公來聘先生具書陳作志
之畧曰竊惟志書之修所以紀山川形勢歷代沿革風土消長
政事利弊以爲守土子民計此州縣之志所以與廿一史禮樂
志兵刑志同爲鄭重也後世多不解此而歷數十年以修但增

詩文數首節孝數人而已不知詩文之載乃文集之事節孝之
登乃史書之事與志之正體無涉也如畿輔通志關係最大者
一曰北邊二曰西山三曰水田北邊則東自山海關起西行若
千里爲某口又西行若干里爲某峪古時何人在此出入何計
在此戰守迤西至居庸宣府轉而南則爲西山若干里至紫荆
若干里至倒馬古者何人從出入何人計戰守前朝防駐兵將
若干今現在駐劄若干以南接於太行使山河形勢瞭然在目
拒守機宜如掌上觀紋若大明一統志廣輿記等曰滿城有某
山某水易州有某山某水而山不計其起訖水不載其源流遂
使一山分峯之名別爲數十山源頭水尾絕無關係之乾流盡
登紙上徒亂人視聽亦何爲乎若夫水田則必通查古人溝渠
如西門豹虞集所開者名何渠在何地今尙有水與否可興可

廢廣西北之糧省東南之運乃有用之事也凡此皆宜廣收古書如廿一史水經注元和郡國志天下山川形勢諸書禹貢地輿考廿一史地輿考以及日下舊聞等碎書皆羅列案上以備查考又遣一有學問者使馳驅北邊西山以及腹內諸形勢一按輿詳記方可下筆則非無據之空言也此豈堪之老病所能任者所以萬難自前者也然念垂注之德意不能已故少陳其愚惟老公祖酌之 二月詔詞贊至莊教其季子習禮並理道傳祠事因攜冀州趙本中族孫述舜同來讀書 謂詞贊曰古者行禮必奏樂上率之祭司缺樂乎今子能琴解歌吹其司之贊奉命撰道傳祠樂章先升歌三終第一解聖道昌明第二解治法醇備第三解樂天安命以琴和歌次笙入二終第一奏黃鐘正宮第二奏大呂變宮第三奏林鐘清宮以笙笛吹之次

合樂三終第一闕迎神引第二闕饗神曲第三闕送神歌以笙
笛和歌鼓板節之撰成進之先生先生曰可訂之 觀察使黃
世發懸扁道傳祠曰周孔正傳 三月上辛先生率門人致祭
顏先生用樂命調贊司琴歌趙本中吹笛劉述舜鼓笙爲文曰
我先生以禮樂立教直紹周孔然禮固實體於冠婚喪祭而樂
則失傳已久及璫在浙問律呂於毛河右歸而撰勺舞先生顧
而樂之乃先生沒後威縣有劉調贊者來學於璫能心解禮樂
之義能琴解歌吹今東莊祠堂告成續修春祀敬撰侑神樂章
以妥我師心尊我師道想神聽之喜可知也庶來格歆歆乎
先生曰春秋如王孫賈祝鮀亦能禮樂兵農之事而無誠正修
身之功故流於雜霸宋儒講誠正修身之道而闕禮樂兵農之
事故入於空虛可知德行道藝偏廢不可也 六月喬公又持

王公督將來堅求作通志總裁辭不得先生言老病不耐暑期以秋七月喬公遣車來迎先生入保定府蓮花池館內修通志王公又以書來聘益谿先生及調贊與鍾子能分纂贊以道傳祠事辭益谿子能隨先生往先生作畿輔通志凡例云一畿輔舊無通志明宏治間命大學士李賢等纂修一統志彙十三省通志而芟潤之冠以兩京僅存梗槩爾歷二百年未有增修缺佚甚夥迄我朝康熙十一年

詔允閣臣請命各省分輯通志而畿輔獨後之至二十一年壬戌告成彼時卽以官闕非臣民所敢志都院皆機務攸司壇壝庾帑悉關大經應於

大清一統志詳載之故通志中僅列內外城門及天官等署於卷首以明神州地在日邊畿甸義先天下也今敘其義仍之二分

野本之周語分星本之周禮保章氏鄭康成註周禮曰今其書亡惟大界可言至漢成帝時劉向造天序說班固取之人地理志唐一行等宗之然各有不同先儒每有駁言且占驗不合前儒又歷紀之似宜置之不載但天道廣大難以臆定而術數家專持一說亦時有中故今仍照舊志登入不敢自用自專也一建置卽有沿革二例難判倘不合書必有重複河南通志及明一統志俱作一門良是茲從之一疆域歷代錯出如順天之涿州爲古范陽定興亦曰范陽山東之青州曰古渤海河間亦曰渤海正定之定州曰古中山保定之唐縣亦曰中山其關人物彼此互書最難分析如張華見於涿志又見於保志於是走蒼亢之荒陂探茂先之故里於涿得張華村其爲涿人也確矣他皆類是一山必取其有關形勢水必擇其有關利害者乃登若

撮爾小峰無所障礙時流時涸雨集溝澮及語怪語神事爲梵
宮琳宇所占據而毫無關實用者不錄一兵制詳考其處武弁
何官防兵幾何以見我朝之有嚴有翼備禦者常也若前朝
衛所制已漣縱有催屯糧徵民饑所不載一八郡各有倉廩不
煩專書故於公署附見之一國之大事在祀典戎各州縣壇廟
制定祭祀無遠弗同詳記其儀恐複故止書祠廟所在下次以
先賢等廟如漢壽亭侯廟王次仲廟之類古人所謂鄉先生沒
而可祀於社者也故以類附若寺觀菴院無附祀典今附於古
蹟後以備都人士遊覽之一助也一畿輔丁地舊制原分兩項
迄雍正二年總督李維鈞題請將丁銀攤入地畝故田賦徵收
微有差分今照新制一一詳載一鹽課爲國課攸關民生資用
故於各州縣下詳附行鹽引數一水利最大王政宜先近奉

皇上睿慮特設官職開北直水利以厚民生謹一一考之列於冊一

職官自督撫而下皆臨民莅政者也自宜通列乃位卑員衆書不勝書茲倣河南例斷自知府以上重方面也司儲闢權雖皆部使不預民事槩未列也一選舉以科貢爲重凡會試得雋者槩不得遺其鄉試得雋者試錄難稽未免掛漏至例貢例監不乏俊乂若號曰選舉則未也一名宦之志人皆實錄事戒阿好近志幾乎有宦皆名無虛非實矣茲擇其有實政可紀者錄之以垂勸而示法也一志爲史料人物宜重然不得宏纖畢登茲必擇其治功德業卓然可傳者以次編纂至於方技仙釋雖其道不可以經世其學不可以範後而卽其一節登峰造極較然不欺則亦日珎木藥物怪人妖異氣所鍾也故附於人物後以見天下事有常必有變者固如是一孝子節婦盈千滿百是騷

虞旅葬而歸昌羣舞矣選而擇之疑傷厚道今

皇上令天下郡邑皆立忠孝節義祠地方申詳部院奏

聞入祠建坊甚盛典也故登節孝必以曾列旌表者爲主弗敢濫
也 八月以病辭回調理 威縣田如龍襲菴來拜問學 九
月上辛祭習齋先生 王公又以車來迎並以帖來邀調養同
往分纂 十月張強李杜文長至府執贊 先生作畿輔形勢
論曰嘗讀禹貢而嘆聖人之觀察精也禹貢隨山自壙入其而
曰太行恒山至於碣石入於海則一語而畿輔形勢如畫圖矣
孔安國作傳尙無悞孔穎達疏則誤解之曰山勢之水皆入海
山不入海也夫經文明曰山入於海蓋卽海外之山如蓬萊方
丈可望而不可卽者其餘氣也故太史公心知其意而作天官
書曰中國山川東北流其維首在隴野屬沒於勃碣宋宋元暉

曰冀州燕山天下第一形勢也華岱峙於左右黃河繞於前
華而嵩爲前案淮南諸山爲第二案江南諸山及五嶺爲三四
案明劉侗曰幽冀阻三面而臨一面據東北之壯以食西南之
腴供西南之腴以養東北之壯故建都者汴洛不如秦秦不如
燕燕汴四衝洛隘小必須天下之力守之秦則守在函關如高
屋建瓴而西北山不綿亘不可守故唐時有回紇土厥之變燕
則背倚雄巍如列屏如負展而左肩爲薊遼長白右肩爲宣大
三關誠居重馭輕之地故自古黃帝卽都涿鹿迄後金元或爲
大都或爲中都尙非正都明永樂都之而仍稱行在惟我
皇朝入膺一統卽定鼎於此熊羆鬱鬱中寧外順幅輳萬里其爲
天造地設以鞏固

皇圖也明矣然案重則肩背須厚今京北則四十八家旋而拱之

効順聽旨飢寒則賑之援之調遣則隨方用之勢如指臂東則永平爲內地遼東爲盛京西則宣府革衛爲州縣大同之北立歸化城皆有重兵屯守肩背可謂厚矣又按史記漢書自河套以東開元以西一二千里卽古所謂山陰也土沃地美可種五穀長人民若盡如

仁皇帝之修熱河募民種植以厚其生又召通儒訓教以明人倫長其恩愛而立之官而屯之兵與畿輔一道同風則肩背愈厚而萬世於以永固矣 十一月又以病回里 十二月作楊仁澍傳 聞營田觀察使黃憲卒於定州乃爲作傳

辛亥七十三歲

正月布政王公又以書幣來請先生臥病不能行將所修通志稿封還具書命調贊至府堅辭之 衡水杜友三兄弟屢來爲

先人作世德記乃爲作之 刻擬太平策

壬子七十四歲

是歲先生以病不能理事惟存心養性以終餘年 懼斯道之

復墜也作永言賦曰老冉冉今已邁兮恐斯文之儻亡良朋遠

隔天涯兮來者又未可逆量上帝降鑒而匪遙兮祝周情孔思

其抱將 訂調贊所纂冠禮士相見禮儀注 思生平同學師

友作憶舊詩曰憑誰引見魯中叟有我步趨負郭顏從顏習齋先生爲聖

學走馬平坡磬聲裏同郭子鳴弦城側滿分間同趙錫毛精序

作風雅列從毛河右先汾上道傳房杜班從王五公先幽薊爬

搔孔氏壁同王崑繩錢塘貫串禹碑山同王草堂作思聖詩

日靜仁動知兩無窮何事營營百歲中花綻水流時自運古今

樂壽首尼翁 先生知病之將不起也乃自作墓志曰李子李

孝愍先生之長子也名堪嘗求仁不能期勉於恕因以恕谷名其鄉而爲號焉孝愍四十後元配馬太君有順德而未立子乃聘易州馬指揮公女爲簪生李子時力爲聖賢學教孝弟主忠信崇禮義廉恥讀論孟學庸以授李子同時有顏習齋先生者崛起近與祁州刁包遠與上蔡張沐辨學謂世儒躐講性天非孔子不可得聞之教法也且禮樂兵農聖門經世之撰皆廢失何以學成致用乃易靜坐入定以習恭內而敬直外而九容交攝讀書猶漢唐訓詁遺習惟擇經史有用書讀之餘不盡究以蹈玩物喪志也嚴課孝弟謹信冠婚喪祭務遵古禮日稽禮樂兵農之允宜今古者而倡六藝以教來學於是李子從之學禮於習齋學琴於張而素射騎則學於趙思光郭金城書則學於王五公彭通數則學於劉見田後又學律呂於毛河右其於明

德則立日譜逐時記身心言行得失勉改至耄老愈追念家學
欲然自歉寡過未能其於親民則與習齋當商酌教養之具每
夜分不寐有所得則錄之謬忘編學政平書訂閱史郝視然惟
恐草野之見無當也七十病後依周禮約入擬太平策李子性
謹畏時或肩輿出門輒悚然曰我何人斯而人肩之坐必躬以
謝肩夫惟恐虛名過情李安溪王太倉相國皆擬薦於

當宁李子懼甚力辭謝有來問學者亦訥訥然不輕資嚴於取與
少年試一等當補廩舊有書公陋規曰是以賄進也辭不補十
四王公西睡使人兩次千金延聘避如江東康熙庚午三十二
歲中順天鄉試迄戊戌年六十選通州學政八月到任時京師
沿門染疾李子亦有中難之意不能理事於十月告病歸里調
攝少平前在都徐少宰秉義吳都憲涵爲刻大學辨業學規纂

至是同人爲刻論語學庸傳注及傳注問又刻易經傳注學禮
小學稽業門人又刻恕谷後集毛河右開雕李氏學樂錄於浙
屆雍正六年年七十又中前病病乃絮綿褰浸而劇委分乘化
馬期百祀屹竣後學爰述斯志

癸丑七十五歲 雍正十一年

正月初一日先生病彌留 一絕云情識劫年運足傷北邙山
下月生光九京若遇賢師友爲識滔滔可易方午時卒 及門
以獻歲未得侍疾聞訃次第來哭至雍正十三年十月會葬調
贊製帳割牲與及門武城劉天植聚強李杜衡水杜謙益博野
劉賁一鍾淑等執喪紳士陳大章鍾鉞白宗伊田如龍等百餘
人共奠馮辰爲文曰嗚呼先生逝矣奄忽三年矣今將安厝曹
原親友及門製幛哀奠囑文於辰不禁嗚咽百拜揮涕爲誄曰

嗚呼唐虞三代不復見於後世乎天胡爲而生先生耶唐虞三代將復見於後世乎何先生抱明德親民之具遂溘然長逝耶嗚呼慟哉先生幼承孝慈先生家學以正直忠孝爲本旣冠從習齋先生遊得周孔久湮之墜緒以三事三物四術四教爲傳習慨然欲見之斯世心性則敬畏清明日三復小心翼翼及清明在躬二語旣如臨深履薄復如海闊天高躬修則肅九容嚴四勿恭而和勤而敏大業克敦小物不廢每五漏蚤起終身弗懈一日倦臥曰安肆日偷可乎悚然起置日譜記身心言行得失時有所省刻有所勵與顏習齋王法乾惲舉聞劉調贊及辰等互勘勸懲嚴密片善微過無少假凡冠婚喪祭燕與相見諸禮準古酌今隨時習行持家甚嚴而孝慈友恭胥盡其道居室甚儉而周急濟難傾囊不吝且善體易道作事刻刻變化而有

典常當問學時躬詣習齋商確學術治道每至夜分不息嘗學
琴於張面白學射御於趙錫之郭子固學書於王五公彭雪翁
學數於劉見田後如浙學樂於毛河右凡海內道學才雋通儒
技勇藝術文士皆委曲納交以悉得其所長至於表前聖既晦
之旨辨後儒似是之非平心以剖易氣而析嘗言聖經言道已
盡出乎此非異端則支離故所著大學辨業聖經學規小學稽
業聖學成法皆以六經爲證據又爲諸經傳注及學六藝等錄
雖詩古文辭片牘隻語無非昌明聖道可以實見之身世者而
經濟之具則在閱史郊觀平書訂擬太平策及郊社禘祫宗廟
田賦等考辨悉依諸經典參以時宜洵純王之政致治之法也
嘗佐政桐鄉鄆城皆確有治績後爲楊慎修敦請如富平吏民
悅服風俗煥然改觀先生每念及民物輒憂憫泣下故禮樂兵

農工虞水火及天文地理諸學皆日夜究心焉且守甚嚴雖一
介不妄取有納賄求關說者峻拒之公卿折節前席惟談論道
德而勢位赫奕漠然無所動於中王侯下聘引疾固辭王相國
李中丞索果亭李在中諸顯達虛左以待皆弗往部檄選縣令
以母老改任通州學正未幾告病歸日夜以承先啟後爲兢兢
執費來學者皆殷勤提誨因材造就咸欲躋之聖域故聞風者
爭自淬礪千百里外多遙拜而私淑焉所謂爲往聖繼絕學爲
萬世開太平者舍先生其誰也從來稱道學者不諳經術能幹
濟者不究身心先生兼綜條貫一源其委於先聖明親至善之
道備體諸身如有用者舉而措之耳乃竟賁志以沒也嗚呼慟
哉先生往矣蒼生無望矣門下小子無所依仿矣海內後進無
所瞻仰矣慟哉嗚呼惟願先生在天之靈左右上帝俾斯道大

行斯民蒙福庶生前未遂之心亦可以少慰矣凡我同人其何
以無負先生而其挽斯文於不墜乎慟哉嗚呼噩性醇酒癢香
敬炷先生之神尙彷彿而容與嗚呼哀哉尙饗 又公上私諡
曰先生道傳前聖學開後儒理應有諡諡按諡法勤學好問道
德博聞曰文先生兼之慈惠愛民經天緯地曰文先生允焉敬
上諡曰文子先生 初八日葬於曹家莊村東北祖兆調贊與
及門諸子送葬慟哭失聲葬返從孝子習中習禮行虞祭禮相
向哭盡哀 請先生神牌入道傳祠配享顏先生 惲皋聞自
江南聞先生歿向北大哭作李恕谷先生傳 乾隆元年丙辰
冬調贊續修先生年譜